

starogradski

OPĆINA STARI GRAD  
SARAJEVO



MUNICIPALITY OF STARI  
GRAD SARAJEVO

# haberi

BESPLATAN PRIMJERAK • DECEMBAR, 2023, broj 59.



**Irfan Čengić novi načelnik  
Općine Stari Grad Sarajevo**

- 2 - 3 Poruka i vizija napretka načelnika Općine Stari Grad Irfana Čengića
- 7 - 9 Planovi razvoja Općine Stari Grad Sarajevo
- 10 - 12 Prijevremeni izbori za Općinskog načelnika
- 14 - 15 Općinsko vijeće Stari Grad
- 23 - 29 Projekti
- 30 - 33 Protokolarne aktivnosti
- 34 - 35 Podrška građanima, učenicima i studentima
- 40 - 41 Dan državnosti BiH
- 42 Nacrt Strategije razvoja 2024/2027. godina



## Impressum

- Izdavač:** Općina Stari Grad Sarajevo
- Pripremili:** Alma Imamović  
Jasenko Jašarević  
Nedim Šahović
- DTP:** Safet Mališević
- Fotografije:** Haris Karamehmedović  
Enhad Goralija
- Štampa:** Štamparija Fojnica d.d.  
Fojnica
- Tiraž:** 3000
- Adresa:** Zelenih beretki br. 4  
71000 Sarajevo
- web:** [www.starigrad.ba](http://www.starigrad.ba)
- e-mail:** [info@starigrad.ba](mailto:info@starigrad.ba)
- Telefon:** +387 33 282 491



## Poruka načelnika



### Poštovani građani,

Hvala vam na povjerenju koje ste mi pružili na nedavnim prijevremenim izborima, omogućivši mi da preuzmem ulogu načelnika Općine Stari Grad Sarajevo. Ovaj trenutak označava ne samo moju ulogu kao načelnika, već i našu kolektivnu mogućnost da oblikujemo budućnost naše lokalne zajednice. Nedavna pobjeda nije samo promjena u vlasti, već i prekretnica koja će osloboditi put za novu viziju, okrenutu prema potrebama i nadama svakog pojedinca u Starom Gradu. Nastavljam svoju dužnost s ciljem prevazilaženja prepreka koje su usporavale napredak naše općine. Sada je vrijeme da zajedno kročimo prema naprijed, s optimizmom i predanošću prema boljoj budućnosti za sve nas.

Dragi građani, naša snaga leži u zajedništvu i solidarnosti. Pozivam vas da se pridružite u izgradnji temelja za novu fazu razvoja Općine Stari Grad Sarajevo. Neka naša međusobna podrška bude temeljna karika koja će osnažiti našu lokalnu zajednicu, a naša predanost razvoju Starog Grada neka nas inspirira u svakom koraku.

S vašom podrškom i povjerenjem, stvaramo novu energiju koja će oblikovati svijetliju budućnost za sve nas. Vaša angažovanost i podrška su ključni za ostvarenje naših zajedničkih ciljeva. Zahvalan sam na vašoj podršci i vjerujem u našu sposobnost da zajedno stvorimo bolje sutra.

S poštovanjem,

**Irfan Čengić**

Načelnik Općine Stari Grad Sarajevo



## Vizija napretka: Program načelnika Irfana Čengića za razvoj Općine Stari Grad Sarajevo

### Planovi, projekti i transparentnost za unapređenje života građana

**O**pćinski načelnik Irfan Čengić predstavio je sveobuhvatan program koji se temelji na tri ključne vrste mjera, naglašavajući hitnost, kontinuirani plan te dugoročne petogodišnje politike kao stubove svog mandata.

### Novi projekti za unapređenje kvalitete života

Jedan od glavnih fokusa programa je stvaranje novih projekata s ciljem unapređenja kvalitete života građana. Planira se izgradnja infrastrukture, proširenje ponude sportskih i kulturnih sadržaja te podrška malim i srednjim poduzećima. Očuvanje bogate kulturne i historijske baštine kroz projekte koji bi privukli turiste i sačuvali naslijeđe za buduće generacije.

### Novi pristup – zajednica za sve

Drugi segment programa usmjeren je na izgradnju novog odnosa između općinske uprave i građana. Načelnik Čengić planira redovne sastanke kako bi aktivno uvažavao potrebe građana te rješavao njihove probleme. Također, naglašava veću transparentnost u radu općinske uprave kako bi svi građani bili informisani o zbivanjima u općini.

### Borba protiv korupcije i veća transparentnost u upravljanju resursima

Treći, ali ne i manje bitan dio programa, odnosi se na stvaranje okoline bez korupcije i povećanje transparentnosti u upravljanju resursima općine. Načelnik



*Borba protiv svih oblika korupcije*

obećava borbu protiv svih oblika korupcije te osiguravanje odgovornog korištenja javnih sredstava u korist svih građana.



## Irfan Čengić zvanično preuzeo funkciju načelnika Općine Stari Grad Sarajevo

**Moj tim i ja ćemo isključivo biti fokusirani na rješavanje svih izazova i problema, privlačenje novih projekata, novo vrijeme bez korupcije uz puno veću transparentnost i bolji odnos prema ljudima.**

**P**redsjednik Centralne izborne komisije Bosne i Hercegovine Suad Arnautović uručio je 17.11.2023. godine Uvjerenje o dodjeli mandata Irfanu Čengiću, čime je zvanično postao načelnik Općine Stari Grad Sarajevo.

Svečana dodjela uvjerenja upriličena je u općinskim prostorijama, a novoimenovani načelnik Općine Stari Grad Sarajevo kazao je da je preuzimanje mandata velika čast, ali i odgovornost.

Predsjednik CIK-a BiH Suad Arnautović čestitao je načelniku Čengiću na imenovanju, te poželio mnogo sreće u predstojećem radu. „Novoizabrani

načelnik Općine Stari Grad Sarajevo Irfan Čengić će imati mandat do oktobra naredne godine. Centralna izborna komisija BiH će po službenoj dužnosti obavijestiti sve općinske načelnike u BiH, kao i predsjedavajuće općinskih vijeća da

je došlo do imenovanja novog načelnika Općine Stari Grad Sarajevo“, kazao je predsjednik CIK-a BiH Suad Arnautović.

Pored novoimenovanog načelnika Irfana Čengića, uručanju je prisustvovala i Mirsada Smajić, koja je do ovog trenutka

### Irfan Čengić, sedmi načelnik Općine Stari Grad Sarajevo

Od osamostaljenja Bosne i Hercegovine i uvođenja demokratskog odabira vlasti, Irfan Čengić je sedmi po redu načelnik Općine Stari Grad Sarajevo, s tim što se do 1994. godine, funkcija općinskog načelnika zvala predsjednik općine. Prije načelnika Irfana Čengića,

ovu funkciju su obnašali:

- **Selim Hadžibajrić** (1991-1994)
- **Mustafa Mujezinović** (1994-1996)
- **Halima Hadžijamaković** (1996-2000)
- **Fehim Škaljić** (2000-2004)
- **Mustafa Resić** (2004-2008)
- **Ibrahim Hadžibajrić** (2008-2023)



*Velika podrška za načelnika Čengića*



*Irfan Čengić, funkciju načelnika preuzeo 17.11.2023. godine*

obnašala funkciju v.d. načelnika Općine Stari Grad, dopredsjedavajući Općinskog vijeća Stari Grad Damir Saračević, općinski vijećnici Vedad Deljković, Alma Jašarević, te Seid Škaljić, predsjedavajući Općinskog vijeća Stari Grad.

Predsjedavajući Škaljić izrazio je zadovoljstvo što Općina Stari Grad nakon dužeg perioda ima novog načelnika.

„Od sada Općina Stari Grad Sarajevo radi u punom kapacitetu sa novoizabranim načelnikom Irfanom Čengićem. Građani mogu očekivati da će se odmah početi sa radom. Ova institucija sada stoji na dvije noge, jedan dio je Općinski načelnik, drugi Općinsko vijeće, te će tako zajedno koračati naprijed sa dobrim projektima“, poručio je predsjedavajući Škaljić.

### Čekaju nas veliki izazovi, ali to neće biti izgovori...



„Općina Stari Grad je općina u kojoj sam rođen, odrastao i sticao svoje političko iskustvo. Čekaju nas veliki izazovi, a to neće biti izgovori, jer ne želim govoriti kako je bilo prije ili optuživati svoje prethodnike. Moj tim i ja ćemo isključivo biti fokusirani na rješavanje svih izazova i problema, privlačenje novih projekata, novo vrijeme bez korupcije uz puno veću transparentnost i bolji odnos prema ljudima. To je ono što nas je dovelo u ovu situaciju. Trudit ćemo se da ispunimo obećanja, posebno za prvih 100 dana ovog mandata“, izjavio je novoimenovani načelnik Općine Stari Grad Sarajevo Irfan Čengić.



# Planovi razvoja za Općinu Stari Grad Sarajevo

**Napredak kroz usmjerenu strategiju: Projekti razvoja Općine Stari Grad Sarajevo pod vodstvom načelnika Irfana Čengića**



**P**rogram općinskog načelnika Irfana Čengića obuhvata brojne projekte i inicijative za razvoj Općine Stari Grad Sarajevo. Naglasak je stavljen na potrebu donošenja Strategije razvoja, što bi omogućilo usmjerenost i koordinaciju različitih sektora kako bi se postigli dugoročni ciljevi.

## Strategija razvoja

Naglašava se potreba za donošenjem strategije kao ključnog dokumenta za usmjeravanje razvoja općine. Strategija bi omogućila usklađeno planiranje i koordinaciju različitih sektora kako bi se postigli dugoročni ciljevi općine. Bez nje, postoji rizik od neusklađenosti i nedostatka fokusa u razvojnim inicijativama.

## Infrastrukturni projekti

U planu su brojni projekti poput izgradnje žičare koja bi povezala centralni dio općine sa Vratnikom, revitalizacije izletišta, obnove javnog bazena, rekon-



*U planu realizacija velikog broja projekata u Starom Gradu*

## Plan napretka

strukcije saobraćajne infrastrukture, škola i javnih prostora. Ovi projekti imaju za cilj unaprijediti kvalitet života građana i promociju turizma.

## Očuvanje kulturnog i prirodnog naslijeđa

Važnost očuvanja kulturne baštine je istaknuta kroz projekte obnove historijskih lokaliteta, podršku turizmu i obnovu ob-

### Stvaranje inkluzivnog i podržavajućeg okruženja za sve građane

Ovi projekti su tek početak sveobuhvatnog plana za transformaciju Općine Stari Grad Sarajevo. Predstavljaju čvrstu predanost izgradnji zajednice u kojoj svaki građanin ima mjesto, osjeća se cijenjenim i podržanim, bez obzira na svoje osobne karakteristike. Kroz ove prijedloge, želi se stvoriti inkluzivno, podržavajuće i raznoliko okruženje koje osnažuje i obogaćuje život svih naših sugrađana.



*Očuvanje kulturne baštine*

jekata s kulturnim značajem. Osim toga, planira se uređenje prostora za rekreaciju kako bi se unaprijedio društveni život i prostor za odmor građana.

## Ekološke inicijative

Inicijative poput postavljanja solarnih panela, poticanje recikliranja i akcije čišćenja imaju za cilj zaštitu okoliša i očuvanje prirode unutar općine. Također, podržava se poljoprivreda kroz pružanje podrške poljoprivrednicima i kroz projekte koji promiču održivu poljoprivredu.

## Državna saradnja i angažman zajednice

Saradnja s državnim tijelima i uključivanje građana je ključno za ostvarenje ciljeva. Planira se saradnja s vladinim tijelima radi osiguranja potrebnih sredstava za projekte, a također se razmatra izdavanje narodnih obveznica kako bi se omogućilo građanima da aktivno učestvuju u finansiranju razvojnih projekata.



*Ovi projekti su tek početak sveobuhvatnog plana za transformaciju Starog Grada*



# Sigurnost, uključenost i napredak: Novi stavovi prema građanima Općine Stari Grad Sarajevo

**N**ovi pristup u stvaranju zajednice koja cijeni raznolikost i podržava sve svoje građane. Naš cilj je izgraditi općinu u kojoj svaka osoba osjeća potpunu podršku i uvažavanje, bez obzira na osobne karakteristike poput položaja, spola, dobi ili sposobnosti.

## Ključni projekti iz ovog područja

Osvježenje radnih mjesta kroz sistematsku sistematizaciju.

S ciljem pravedne i transparentne raspodjele radnih mjesta, angažovati ćemo stručnjake za ljudske resurse kako bismo stvorili novu strukturu radnih mjesta. Fokusirat ćemo se na pružanje kvalitetnih usluga građanima putem efikasnijih radnih procesa.

## Podrška sportu i obrazovanju

Povećat ćemo budžet za sport kako bismo podržali sportske aktivnosti, posebno mladih. Također, investirat ćemo u programe obrazovanja, uključujući stipendiranje i podršku školama kako bismo osigurali kvalitetno obrazovanje za našu mladost.

## Poboljšanje dostupnosti uprave i transparentnosti

Otvorit ćemo vrata zgrade Općine građanima, omogućujući im jednostavan pristup. Uvest ćemo državne službenike za praćenje realizacije inicijativa vijećnika i upita građana kako bismo osigurali transparentnost i odgovornost.

## Kulturna raznolikost i inkluzija

Povećat ćemo broj kulturnih mani-



*Podrška sportiskim aktivnostima*

festacija i podržati projekte na otvorenom prostoru kako bismo obogatili kulturni život općine. Osim toga, nastavit ćemo rad na inkluziji osoba s invaliditetom kroz zapošljavanje, podršku postojećim centrima i promovisanje njihove inkluzije u društvo.

## Podrška inkluzivnosti i rodnoj ravnopravnosti

Aktivno ćemo raditi na osnaživanju žena i povećanju njihove zastupljenosti na rukovodećim pozicijama, promovirajući rodnu ravnopravnost. Također, podržat ćemo programe inkluzije za osobe s invaliditetom kako bi im se omogućila podrška u obrazovanju i zapošljavanju.

## Okruženje koje cijeni svakog građanina

Svi građani zaslužuju zajednicu u kojoj se osjećaju prihvaćeno, podržano i uvaženo, neovisno o svojim jedinstvenim karakteristikama. Upravo to je temelj na kojem počiva predanost transformaciji Općine Stari Grad Sarajevo. Ovi projekti, samo su uvod u sveobuhvatan plan. Oni predstavljaju posvećenost stvaranju

inkluzivnog i poticajnog okruženja u kojem svatko ima svoje mjesto. Kroz ove prijedloge, cilja se na kreiranje zajednice koja slavi raznolikost i pruža podršku svakom pojedincu.

Fokus je jasan: želi se stvoriti okruženje koje osnažuje svakog građanina, potiče različitost i obogaćuje život svih. Ovaj plan je početak putovanja prema inkluzivnijem društvu koje gleda naprijed, uzimajući u obzir potrebe i vrijednosti svih građana.

### Cilj - Uspješna budućnost

Ovaj opsežan program obuhvata širok spektar područja kako bi se unaprijedio život građana, očuvao identitet općine i potaknuo njen održivi razvoj. Ključna tačka ovog plana ostaje donošenje Strategije razvoja koja bi omogućila usmjerenost i koordinaciju svih ovih projekata prema zajedničkim dugoročnim ciljevima općine.

Strategija razvoja Općine Stari Grad Sarajevo postavlja temelje za usmjeren, održiv i prosperitetan razvoj. Bez ovog ključnog dokumenta, rizikuje se gubitak prilika za napredak zajednice.

## Prijevremeni izbori za Općinskog načelnika



# Pobjeda Irfana Čengića (SDP) na Prijevremenim izborima: **Osvojio 62,96% glasova**

**Pravo učešća na Prijevremenim izborima za načelnika Općine Stari Grad Sarajevo imala su dva politička subjekta, a ukupan broj registrovanih birača na području općine Stari Grad Sarajevo iznosio je 36.197.**

**N**edavno održani Prijevremeni izbori za načelnika Općine Stari Grad Sarajevo privukli su veliku pažnju javnosti. Ovi izbori bili su su zakazani za nedjelju, 29. oktobra 2023. godine, prema odluci Centralne izborne komisije Bosne i Hercegovine, koja je utvrdila da je procedura opoziva bivšeg načelnika, Ibrahima Hadžibajrića, provedena u skladu sa zakonom.

Općina Stari Grad Sarajevo je na dan izbora otvorila 46 biračkih mjesta, osiguravajući tako neometano glasanje svojim građanima. Pravo učešća na Prijevremenim izborima za načelnika Općine Stari Grad Sarajevo imala su dva politička subjekta, a ukupan broj registrovanih birača na području općine Stari Grad Sarajevo iznosio je 36.197.

## Izborni proces protekao je bez problema

Općinska izborna komisija Stari Grad je uložila znatne napore kako bi se osigurala adekvatna priprema i provedba Prijevremenih izbora. Provedena je obavezna edukacija za predsjednike i članove biračkih odbora i njihovih zamjenika, uključujući testiranje i certificiranje, a sve s ciljem osiguranja stručnosti i kvalitetnog vođenja biračkih mjesta na dan izbora. Također, urađen je i proces akreditovanja posmatrača za nadgledanje izbornih aktivnosti izborne komisije, Centra za birački spisak, biračkih mjesta i drugih izbornih mjesta.


Oni koji su zbog starosti, bolesti ili invalidnosti bili spriječeni da glasaju na

## Trijumf Irfana Čengića na Prijevremenim izborima

Prema potvrđenim rezultatima 6.902 birača, odnosno 62,96% dalo je svoj glas kandidatu Irfanu Čengiću (SDP). Drugi kandidat na ovim Prijevremenim izborima Dženan Selimbegović (SDA) osvojio je 4.060 glasova, što je procentualno 37,04%. Ukupan broj obrađenih listića je 11.071, a važećih listića 10.962.

biračkim mjestima, svoje pravo ostvarili su putem mobilnih timova. Općinska izborna komisija Stari Grad je primila 143 zahtjeva za ovakav način glasanja te je formirano sedam mobilnih timova koji su obilazili teren na dan izbora.

## Prijevremeni izbori za Općinskog načelnika



Centralna izborna komisija BiH je 10.11.2023. godine potvrdila rezultate Prijevremenih izbora

### Centralna izborna komisija BiH potvrdila rezultate

Centralna izborna komisija Bosne i Hercegovine je 10.11.2023. godine na 72. sjednici donijela odluku kojom su potvrđeni rezultati prijevremenih izbora za načelnika Općine Stari Grad Sarajevo, održanih 29.10.2023. godine. Prema rezultatima izbora Irfan Čengić (SDP) je novoizabrani načelnik Općine Stari Grad Sarajevo. Odluka o potvrđivanju i objavljivanju rezultata prijevremenih izbora za načelnika Općine Stari Grad Sarajevo stupila je na snagu danom donošenja i objavit će se u „Sl. glasniku BiH“, „Sl. glasniku RS“, „Sl. glasniku F BiH“, „Sl. glasniku Brčko distrikta BiH“ i na internet stranici Centralne izborne komisije Bosne i Hercegovine [www.izbori.ba](http://www.izbori.ba).



### Referendum u Općini rezultirao opozivom načelnika

U Općini Stari Grad Sarajevo je 23.07.2023. godine proveden referendum za opoziv općinskog načelnika Ibrahima Hadžibajrića. Tog dana za opoziv je glasao 3.791 građanin Starog Grada, a protiv opoziva 1.050 građana. Centralna izborna komisija BiH usvojila je 17.08.2023.godine Odluku o opozivu općinskog načelnika Ibrahima Hadžibajrića, a 30.08.2023.godine Odluku o raspisivanju i održavanju prijevremenih izbora za načelnika Općine Stari Grad Sarajevo.



Referendum održan 23.07.2023. godine

## Prijevremeni izbori za Općinskog načelnika

# Rezultati Prijevremenih izbora po biračkim mjestima

Najviše građana svoje biračko pravo ostvarilo je u mjesnoj zajednici Mošćanica, potom u mjesnoj zajednici Vratnik, te mjesnoj zajednici Logavina. Najmanji broj birača glasao je u mjesnoj zajednici Ferhadija.

### Uputstvo za korištenje tabele rezultata Prijevremenih izbora po biračkim mjestima

Ova tabela sadrži rezultate Prijevremenih izbora po biračkim mjestima. Kolone označene crvenom bojom sadrže rezultate koje je osvojio Irfan Čengić, dok su rezultati koji se nalaze u plavoj koloni rezultati Dženana Selimbegovića.

Biračko mjesto	Mjesna zajednica	Glasova	
137A001	Širokača	148	79
137A002	Širokača	115	91
137A003	Širokača	104	86
137A004	Toka - Džeka	96	85
137A005	Toka - Džeka	109	63
137A006	Mahmutovac	162	94
137A007	Mahmutovac	96	72
137A008	Mahmutovac	113	69
137A009	Hrid - Jarčedoli	134	120
137A010	Hrid - Jarčedoli	117	112
137A011	Hrid - Jarčedoli	135	172
137A012	Babića Bašča	105	117
137A013	Babića Bašča	149	53
137A014	Bistrik	147	117
137A015	Bistrik	140	70
137A016	Bistrik	182	91
137A017	Bistrik	122	91
137A018	Mjedenica	138	70
137A019	Mošćanica	191	104
137A020	Mošćanica	284	58
137A021	Mošćanica	285	47
137A022	Mošćanica	248	87
137A023	Vratnik	167	103

Biračko mjesto	Mjesna zajednica	Glasova	
137A024	Vratnik	187	112
137A025	Vratnik	151	105
137A026	Vratnik	165	59
137A027	Kovači	152	88
137A028	Kovači	114	98
137A029	Sumbuluša	122	82
137A030	Sumbuluša	163	120
137A031	Medrese	157	86
137A032	Medrese	138	83
137A033	Medrese	122	89
137A034	Medrese	126	115
137A035	Sedrenik	149	67
137A036	Sedrenik	117	96
137A037	Sedrenik	185	127
137A038	Logavina	98	45
137A039	Logavina	135	69
137A040	Logavina	115	64
137A041	Logavina	142	83
137A042	Logavina	143	100
137A043	Bašćaršija	180	49
137A044	Bašćaršija	113	73
137A045	Bašćaršija	121	45
137A046	Ferhadija	125	52



## Općinsko vijeće

### 29. sjednica

#### Općinskog vijeća

Općinsko vijeće Stari Grad Sarajevo održalo je 28.09.2023. godine 29. redovnu sjednicu na kojoj je, između ostalog, usvojen zaključak o hitnom poduzimanju aktivnosti na rješavanju problema kanalizacione mreže u ulici Bakarevića, kao i sanacije urušenog propusta u trupu magistralne ceste. U ime građana ulice Bakarevića sjednici je prisustvovala Širaza Brka koja je dostavila inicijativu za rješavanje problema u ulici Bakarevića potpisanu od strane 132 stanovnika ove i okolnih ulica. Usljed većih padavina ova ulica biva poplavljena, a nakon povlačenja voda za sobom ostavlja mulj i fekalije.

Predsjedavajući Općinskog vijeća Seid Škaljić detaljnije je vijećnike upoznao sa ovim problemom kazavši da su nadležne službe bile na terenu i izvjestile ga o stanju. Osnovni problem je urušeni cestovni propust koji se nalazi u trupu magistralne saobraćajnice koja je u nadležnosti JP Ceste Federacije BiH.

Općinsko vijeće Stari Grad je na sjednici stavilo van snage zaključke



*Usvojen zaključak o rješavanju problema kanalizacione mreže u ulici Bakarevića*

kojima je 2019. i 2020. godine dato ovlaštenje općinskom načelniku Ibrahimu Hadžibajriću da angažuje advokate za zastupanje Općine pred nadležnim sudovima u postupcima koje su pokrenuli smijenjeni pravobranioци i zamjenici pravobranilaca Općine Stari Grad Sarajevo. Općinskom pravobranilaštvu je

naloženo da izvrši primopredaju predmeta od ovlaštenih advokata i preuzme zastupanje Općine Stari Grad u istim.

Na sjednici Općinskog vijeća verifikovani su mandati samostalnih vijećnika: Amrudina Džanovića, Sabahudina Arapovića, Alije Begića i Seida Škaljića.

### 30. sjednica

#### Općinskog vijeća

Općinsko vijeće Stari Grad Sarajevo održalo je 26.10.2023. godine 30. redovnu sjednicu koja je počela odavanjem počasti - učenjem Fatihe i minutom šutnje, za nevine žrtve ubijene u Gazi, te za ubijene sarajevske policajce Adisa Šehovića i Davora Vujinovića, koji su na ovaj dan prije pet godina ubijeni u naselju Alipašino Polje izvršavajući svoje redovne zadatke.

Na prijedlog dopredsjedavajućeg Općinskog vijeća Stari Grad Damira Saračevića, Općinsko vijeće danas je jednoglasno usvojilo Deklaraciju o osudi nasilja u Gazi, posebno osuđujući napade na bolnice, civile i djecu. "Predložio sam inicijativu da se usvoji deklaracija u kojoj se osuđuju zločini nad stanovništvom Gaze i svim civilima jer je to najmanje što možemo uraditi kao građani Sarajeva i Starog Grada, jer smo i sami prolazili kroz to. Dizanjem glasa barem koliko-toliko pomažemo stanovništvu Gaze koji prolaze kroz zaista nedopustiv teror," poručio je dopredsjedavajući Saračević.

Na prijedlog vijećnika u Općinskom vijeću Stari Grad Sejfe Šehovića, Općinsko vijeće je također jednoglasno usvojilo inicijativu o izdvajanju sredstava u iznosu od 50.000 KM za pomoć stanovništvu Gaze koja će biti realizovana kada se steknu uslovi. Šehović je prilikom pojašnjavanja inicijative podsjetio koliko je



*Usvojen Prijedlog zaključka o davanju naziva mostu preko puta Vijećnice – "Most Mustafa Mujezinović"*

našem narodu značila svaka vrsta pomoći u vrijeme agresije na Bosnu i Hercegovinu, te da je veoma značajno poslati poruku da smo i na ovaj način uz narod Palestine.

#### **Most Mustafa Mujezinovića**

Jedna od tačaka koje su se našle na dnevnom redu 30. sjednice Općinskog vijeća Stari Grad Sarajevo je i Prijedlog zaključka o davanju naziva mostu prekoputa Vijećnice – "Most Mustafa Mujezinović", koji je usvojen većinom glasova.

# 31. sjednica

## Općinskog vijeća

Općinsko vijeće Stari Grad održalo je 31. redovnu sjednicu, prvu od kada je funkciju načelnika Općine Stari Grad Sarajevo preuzeo Irfan Čengić. Na samom početku sjednice predsjedavajući Općinskog vijeća Stari Grad Seid Škaljić čestitao je novoimenovanom načelniku Irfanu Čengiću na izbornoj pobjedi, te mu poželio uspjeh u radu i dobru saradnju sa Općinskim vijećem Stari Grad. Isto su poželjeli i svi vijećnici koji su imali riječ za govornicom. Jedna od značajnih tački Dnevnog reda je bio Nacrt Strategije razvoja Općine Stari Grad Sarajevo za period 2024/2027. godina.

Općinski načelnik Irfan Čengić kazao je da je jedna od ključnih tačaka njegovog rada u početnim fazama mandata bila donošenje ove razvojne strategije: „Općinski vijećnici usvojili su Zaključak o strategiji nakon čega ovaj dokument ide u Javnu raspravu u trajanju 30 dana, odnosno do 30.12.2023. godine. Ovim putem pozivam sve građane, vijećnike, te ostale relevantne i nadležne subjekte da se uključe u izradu konačnog dokumenta strategije. Ovo nije ničija privatna, već isključivo strategija razvoja naše lokalne zajednice“, kazao je načelnik Čengić.

### Nacrt Strategije razvoja Općine Stari Grad za period 2024-2027. godinu

Na izradi Nacrta Strategije razvoja Općine za period 2024/2027. godina, a koju je predstavio općinskim vijećnicima, radio je prof.dr. Dževad



Čestitke novoimenovanom načelniku Irfanu Čengiću na izbornoj pobjedi

Šašić, konsultant Saveza općina i gradova FBiH na izradi razvojnih strategija. „U proteklih sedam mjeseci pristupilo se izradi strategije razvoja kao integralnog i multisektorskog dokumenta koji obuhvata tri strateška cilja. Oni se odnose na unapređenje ekonomskog razvoja, okolinskih politika, energetske efikasnosti i društvenog ambijenta u općini Stari Grad. Vrijednost ove strategije i pratećih projekata je 52 miliona KM“, pojasnio je prof. Šašić.


Prema Zaključku o strategiji koju je usvojilo Općinsko vijeće, Nacrt Strategije razvoja Općine Stari Grad za period 2024-2027. godinu ide u Javnu raspravu koja će tra-

jati do 30.12.2023. godine. Subjekti ove rasprave su Općinsko vijeće, Općinski načelnik, službe Općine Stari Grad, Općinski pravobranilac, političke stranke, odnosno Klubovi vijećnika, nadležna radna tijela Općinskog vijeća, savjeti mjesnih zajednica Općine Stari Grad, te građani sa područja općine Stari Grad. Prijedlozi se podnose pismeno na e-mail adresu kabinet@starigrad.ba. Nakon sumiranja rezultata javne rasprave, te nakon razmatranja svih eventualnih sugestija i prijedloga učesnika javne rasprave, finalni tekst Strategije će u formi prijedloga biti pripremljen i upućen Općinskom vijeću na razmatranje i usvajanje.

### Info ured Turističke zajednice Kantona Sarajevo se vraća u Stari Grad

Nakon što su krajem novembra održali sastanak općinski načelnik Irfan Čengić i predsjednik Turističke zajednice Kantona Sarajevo Haris Fazlagić, na Dnevni red po skraćenom postupku uvrštena je tačka dodjele poslovnog prostora u Starom Gradu. „Delegirali smo ovu tačku kako bi ponovo vratili Info ured Turističke zajednice Kantona Sarajevo u srce Starog Grada u ulicu Sarače. Mi smo turistička općina naširoko poznata i jako nam je važno da turisti imaju direktnu komunikaciju sa nadležnom institucijom i gdje mogu dobiti puno više informacija o turističkoj ponudi naše općine, ali i grada i kantona“, kazao je predsjedavajući Općinskog vijeća Stari Grad Seid Škaljić.

U nastavku 31. sjednice općinski vijećnici jednoglasno su podržali Prijedlog zaključka o pokretanju aktivnosti za formiranje Javnog preduzeća Općine Stari Grad Sarajevo, kao i Prijedlog odluke o izmjenama i dopunama Budžeta Općine Stari Grad Sarajevo za 2023. godinu (Rebalans Budžeta). Također, primljen je k znanju Izvještaj Ureda za reviziju institucija u Federaciji Bosne i Hercegovine o finansijskoj reviziji Općine Stari Grad Sarajevo za 2022. godinu. Na osnovu ovog izvještaja jednoglasno je usvojen Zaključak o pokretanju izrade novog Nacrta Statuta Općine Stari Grad Sarajevo, a postupajući po preporuci Ureda za reviziju institucija u FBiH.



Turist info biro KS se vraća u Sarače

## Intervju: Općinski vijećnici

# Razgovori sa vijećnicima Općinskog vijeća Stari Grad Sarajevo

**Planovi i očekivanja • Najznačajnije inicijative • Komentari o majskim dešavanjima u Općini • Saradnja sa novoimenovanim općinskim načelnikom**

Obavili smo razgovore sa nekoliko članova Općinskog vijeća Stari Grad Sarajevo, a zanimale su nas različite tematike. Od onih koji se tiču lično njihovog rada, učešća i inicijativa u Općinskom vijeću proteklih godina, pa sve do aktuelnih dešavanja u Općini Stari Grad. Saznali smo i šta planiraju za Lokalne izbore 2024. godine, te kako vide saradnju sa novoimenovanim općinskim načelnikom Irfanom Čengićem.

## Seid Škaljić, predsjedavajući Općinskog vijeća Stari Grad Sarajevo

□ **Koliko dugo obavljate funkciju vijećnika u Općinskom vijeću i zašto ste odlučili obavljati tu ulogu?**

Za vijećnika u Općinskom vijeću Stari Grad Sarajevo prvi put sam izabran 2012. godine. Sada sam pri kraju trećeg mandata što je poprilično dug period. Na potez da se kandidiram na ovu funkciju je došlo iz revolta i nezadovoljstva mene kao građanina procesom dobijanja saglasnosti i dozvola, prvenstveno za gradnju. Imao sam nekih ličnih iskustava po tom pitanju, ušao sam detaljno u tu tematiku, odnosno kroz niz općinskih i kantonalnih pravila. Smatrao sam da se za promjene, konkretno u ovoj oblasti, mora uključiti u politiku. I danas sam tog uvjerenja i volio bih da se više ljudi uključuje u politiku, jer to je jedini demokratski način mijenjanja stvari.

□ **Čime se najviše ponosite, a učinili ste obavljajući ulogu općinskog vijećnika, a kasnije i predsjedavajućeg?**

Kao vijećnik, najviše se ponosim kontinuiranim povjerenjem građana. To je dokaz da su ljudi prepoznali čestitost i sposobnost da se pomogne drugima. Svi mi u Općinskom vijeću smo izabrani od strane građanstva, koje očekuje pozitivne promjene za vrijeme trajanja naših mandata. Obnova mandata je ponos svakog vijećnika zasigurno, jer to nije jednostavno. Realizacija određenih projekata ne ovisi samo o općinskom nivou, a to je nekad teško predstaviti i objasniti građanima. Ponosan sam na svoju svakodnevnu i dugogodišnju komunikaciju sa stanovnicima.

Moje obavljanje funkcije



Predsjedavajući Općinskog vijeća, Seid Škaljić

### Dugo poznanstvo sa načelnikom Čengićem

„Načelnik Irfan Čengić i ja se poznajemo privatno jako dugo. Igrom slučaja smo iz iste ulice, pratimo rad jedan drugog već duži vremenski period, nemamo ni starosnih barijera između sebe. To će nadam se biti jedan razlog više za što bolju i produktivniju saradnju za dobrobit građana Općine Stari Grad“, poručio je predsjedavajući Škaljić.

predsjedavajućeg Općinskog vijeća Stari Grad je zasigurno obilježeno majskim dešavanjima, odnosno načinom prevazilaženja te situacije i problema od strane Općinskog vijeća. Desio se definitivno jedinstven slučaj u čitavoj FBiH, ali i BiH. Nije bilo zakonskog propisa, međutim mi smo našli mogućnost, dobili saglasnosti od nadležnih ministarstava pravde kako bi

prevazišli probleme. Ponosan sam što sam na čelu takvog vijeća, koje se tako profesionalno postavilo u vrlo teškoj i izazovnoj situaciji.

□ **Kako ocijenjujete situaciju u kojoj se Općina Stari Grad Sarajevo našla od maja mjeseca 2023. godine i reakcije Općinskog vijeća na istu?**

Svi vijećnici su u toj novonastaloj situaciji pokazali visok stepen profesionalizma i odgovornosti. U potpunosti su ispoštovali zakletvu koju su položili na početku svog mandata i nisu dozvolili da ona bude samo mrtvo slovo na papiru. Na taj način su opravdali svoj mandat u Općinskom vijeću. I pored vrlo teške situacije, koje građani nisu svjesni, Općina Stari Grad je nastavila normalno funkcionisanje i pružala je sve usluge, iako smo administrativno bili u jednoj teškoj blokadi. Hvala Bogu, nekoliko mjeseci nakon tih događanja, imali smo sjednicu Općinskog vijeća



## Intervju: Općinski vijećnici

Stari Grad u punom kapacitetu i uvjeren sam da ćemo brzo sustići zaostatak koji je nastao od maja mjeseca ove godine.

- **Kakav je Vaš plan djelovanja i koje su glavne inicijative koje želite realizovati do kraja mandata i da li se planirate kandidirati na idućim Lokalnim izborima 2024. godine?**

Moja velika želja je i dalje riješiti dugoročno problem sa zimskim održavanjem saobraćajnica u Starom Gradu. To sam rekao i na početku svog mandata, zajedno sa povećanjem izdvajanja pomoći ugroženim kategorijama stanovništva, što se realizovalo. Te stavke su sada puno veće nego na početku mog mandata. Zalagao sam se i za jačanje programa start-up poslovnih prijedloga. Za tu stavku se također enormno povećao budžet, skoro tri puta. Zadnji veliki zalogaj koji je ostao je konačno rješenje zimskog održavanja. Bilo je pokušaja, ali nije jednostavno to riješiti. Moje mišljenje da se u tom slučaju ne smijemo samo prepustiti KJKP „Rad“ na milost i nemilost, i pored enormnih sredstava koje se troše za tu namjenu. Volio bih i da

Općina Stari Grad aktivno učestvuje u obnovljivim izvorima energije. Inicijativa koju sam pokrenuo prošle godine, postavljanje fotonaponskih elektrana, odnosno priprema lokacija za investitore, prvenstveno građane općine Stari Grad, će se nadam se privesti kraju do isteka mog mandata.



*Dugoročno rješavanje problema sa zimskim održavanjem*

Rano je pričati o kandidaturi za Lokalne izbore naredne godine. To se najbolje čuje šetnjom kroz grad, kroz našu čaršiju i mahale. Tu je najsigurnije dobiti povratnu informaciju da li će se dobiti podrška ili ne.

- **Kako ocjenjujete Vašu saradnju sa novoimenovanim načelnikom Općine Stari Grad Sarajevo i šta očekujete u narednom periodu?**

Dinamika djelovanja načelnika Čengića se odmah dala primjetiti od samog dolaska. To je jako korisno za ovu instituciju. Općina Stari Grad svakako treba da vodi računa o svojoj tradiciji i prošlosti, ali uz jedan novi i dinamičniji pristup. Načelnik Čengić to zasigurno zna i može prepoznati, a to i pokazuje u svojim prvim sedmicama djelovanja. Velika stvar da je prvi dan nakon Prijevremenih izbora za načelnika Općine Stari Grad, Irfan Čengić je došao u posjetu Općinskom vijeću i pokazao pravac u kojem želi djelovati, odnosno da shvata važnost Općinskog vijeća u procesu donošenja odluka. U tome ide korist da je načelnik Čengić nekada obnašao funkciju općinskog vijećnika i dopredsjedavajućeg Općinskog vijeća Stari Grad.

## Vedad Deljković,

šef Kluba samostalnih vijećnika u Općinskom vijeću Stari Grad

- **Možete li nam reći što Vas je motivisalo da preuzmete ulogu vijećnika te koliko dugo obavljate tu funkciju?**

Prvi put sam izabran za člana Općinskog vijeća 2012. godine. Tada sam imao 27 godina i već tada sam shvatio da se mnogi životni problemi naših građana mogu riješiti na lokalnom nivou. Svjestan sam da je ključno pružiti potpunu informaciju i smjernice onima čije se potrebe ne mogu zadovoljiti na lokalnom nivou, kako bi znali gdje potražiti svoja prava. Moja želja je bila pridonijeti dobrobiti svojih košija, prijatelja i općenito svih stanovnika Starog Grada. Kroz aktivno učestvovanje u radu Općinskog vijeća, nastojao sam artikulirati njihove probleme te uporno zahtijevati konkretne odgovore i rješenja. Smatram da je važno osigurati da se svakom građaninu pruži podrška te da se njihovi problemi aktivno rješavaju.



*Šef Kluba samostalnih vijećnika, Vedad Deljković*

## Intervju: Općinski vijećnici

- *Koji su Vaši planovi djelovanja i glavne inicijative koje želite realizovati do kraja svog mandata?*

Planiram ostati dostupan i angažovan za sve građane Starog Grada. Želim se fokusirati na poboljšanje uslova života za socijalno ugrožene, penzionere, djecu i mlade. To uključuje veća sredstva za podršku socijalno ugroženim porodicama, pomoć penzionerima s najnižim primanjima, povećanje stipendija za učenike, podršku mladima u pokretanju vlastitih poslova, izgradnju dječjih igrališta na svakom području te još mnogo toga. Mislim da ćemo sada moći konkretnije i obimnije realizovati ove ciljeve.

- *Možete li opisati što je bilo ključno u odluci o pokretanju inicijative za opoziv općinskog načelnika i kako ste procijenili situaciju u Općini koja je dovela do te odluke?*

Odlučio sam pokrenuti inicijativu za opoziv načelnika procjenjujući da će problem potrajati. Alternativa je bila trošenje budžeta na plate i naknade umjesto na projekte iz različitih sektora, čime bi realizacija mnogih važnih projekata bila neizvjesna. Budžet ne bi trebao služiti samo za plate. Moja procjena se pokazala tačnom, jer bi bez pokretanja ovog procesa sada bili u agoniji, a to bi se nastavilo i sljedeće godine jer opoziv nije dopušten u izbornoj godini. Glavne prepreke tokom pripreme inicijative za opoziv načelnika bile su vezane uz prvi

### Napredak kroz partnerstvo

Ističući svoju podršku i spremnost za pomoć, Deljković naglašava da je saradnja s načelnikom Irfanom Čengićem ključna u izazovnom zadatku uspostavljanja stabilnih temelja za efikasno funkcionisanje Općine.

„Saradnja s načelnikom Irfanom Čengićem je dobra i korektna. Pred njim je zahtjevan zadatak - uspostaviti stabilne osnove za efikasno funkcionisanje Općine, naročito s obzirom da je kraj godine i nagomilane probleme zbog dugotrajne blokade institucije.

Naravno, tu sam kako bih pružio podršku i pomoć u svemu što mogu“, istako je Deljković.



*Tu sam kako bih pružio podršku i pomoć*

opoziv u Kantonu Sarajevo, što je zahtijevalo detaljan plan i razmatranje svih rizika. Otežavajuća okolnost bilo je vrijeme godišnjih odmora, pa smo uložili dodatni napor da animiramo građane za referendum. Građani su već bili zasićeni politikom i nisu željeli biti uključeni zbog negativnih iskustava. Razumijem tu perspektivu,

ali samo njihovim učestvovanjem na izborima možemo stvari mijenjati nabolje. Inicijativa za opoziv dobila je podršku 23 vijećnika, što je više od 2/3 vijeća. Ovo pokazuje ozbiljnost i odgovornost vijećnika prema dobrobiti građana i deblokadi rada Općine. Nakon uspješnog prvog koraka, proces je nastavljen u skladu sa zakonom.

- *Čime se najviše ponosite u obavljanju uloge općinskog vijećnika?*

Imao sam mnogo inicijativa, ali nažalost, većina nije realizovana zbog nedostatka interesa bivšeg načelnika. Ipak, od onih koje su ostvarene, najdraže su mi one koje se tiču poboljšanja uslova u osnovnim i srednjim školama na području općine Stari Grad. Uvjeren sam da svaka škola na našem području, zahvaljujući inicijativama koje sam pokrenuo, unaprijedila neki aspekt obrazovanja ili poboljšala uslove rada kroz infrastrukturne projekte. To me izuzetno raduje i čini sretnim.

## Adla Kupusović, šef Kluba Naše stranke u Općinskom vijeću Stari Grad

- *Koliko dugo obavljate funkciju vijećnika u Općinskom vijeću i zašto ste se odlučili za tu ulogu?*

Funkciju vijećnice obavljam od 2016. godine i trenutno sam u svom drugom mandatu. Lokalna politika je najbliža građanima jer omogućava brzu vidljivost djelovanja kroz ostvarene inicijative. Radom na lokalnom nivou poboljšavamo i olakšavamo svakodnevni život ljudi u našoj zajednici. Važno mi je osigurati da ljudi koje zastupam budu zadovoljni mojim radom i radom mog Kluba. Ako usmjerimo pažnju na sve aspekte, osjećat ćemo se zadovoljnije sobom, ali i stvarima oko nas.



*Adla Kupusović sa kolegama Handžićem i Ljuharom iz Naše stranke i načelnikom Čengićem*

## Intervju: Općinski vijećnici

- **Šta je ono čime se najviše ponosite u svojoj ulozi općinske vijećnice, posebno učinjeno zajedno sa svojim Klubom vijećnika?**

Posebno sam ponosna na veliki broj ostvarenih inicijativa tokom oba mog mandata, ali posebno bih istakla inicijativu iz 2017. godine, kada smo, na prijedlog Kluba Naše stranke, povećali naknade za porodilje i rekonstruisali ulicu Kovači, jednog od bisera Starog Grada. Ponosna sam na naš Klub jer smo uvijek djelovali u najboljem interesu naših komšija i sugrađana.

- **Kako biste ocijenili reakciju Općinskog vijeća i vašeg Kluba na neobičnu situaciju u kojoj se Općina Stari Grad Sarajevo našla od maja 2023. godine?**

Ponosna sam na reakciju Općinskog vijeća Stari Grad Sarajevo u izazovnoj situaciji koja se dogodila u maju 2023. godine. Učinili su sve kako bi spriječili

zastoj u radu Općine i osigurali da zahtjevi građana budu ispunjeni bez smetnji. Raduje me što je cijeli proces referendumu prošao tehnički i organizacijski besprijekorno, s obzirom na to da je prvi put da se općina u Kantonu Sarajevo našla u ovakvoj situaciji, te nismo imali priliku koristiti dobre prakse iz prošlosti.

- **Kako biste ocijenili vašu saradnju s novoimenovanim načelnikom Općine Stari Grad Sarajevo i kakva očekivanja imate za naredni period?**

Klub vijećnika Naše stranke podržao je kandidaturu načelnika Irfana Čengića i ovom prilikom mu čestitam na izboru. Vjerujem u kvalitetnu saradnju s obzirom na naglašeni značaj Općinskog vijeća u procesu odlučivanja, što je više puta istaknuto od strane Općinskog načelnika. Pred nama je obiman posao - donošenje i unapređivanje mnogih

akata. Mislim da je važno iskoristiti pozitivnu atmosferu koja je proizašla iz izbora novog načelnika te putem dijaloga i zajedničkog djelovanja unaprijediti život naših sugrađana.

- **Koji su vaši planovi djelovanja i kojim glavnim inicijativama težite do kraja mandata?**

S obzirom na predstojeću budžetsku godinu, ključni fokus će biti učestvovanje u javnoj raspravi o Nacrtu budžeta gdje ćemo kao Klub dati svoje prijedloge, temeljene na zahtjevima naših komšija. Naše glavno zalaganje bit će stvaranje kvalitetnog prijedloga Strategije razvoja, ključnog dokumenta za razvoj Općine. Također, radit ćemo na uređenju kombi stanice na Bašćaršiji, izgradnji opservatorija na Trebeviću te unapređenju turističke ponude u Starom Gradu, što su neke od inicijativa na kojima ćemo raditi u narednom periodu.

## Muamer Mekić, šef Kluba SDP-a u Općinskom vijeću Stari Grad

- **Kako biste opisali svoje iskustvo kao vijećnik u Općinskom vijeću Stari Grad Sarajevo i Gradskom vijeću grada Sarajeva?**

Već drugi mandat sam vijećnik u Općinskom vijeću Stari Grad Sarajevo, te prvi mandat Gradski vijećnik u Gradskom vijeću grada Sarajeva. Vođenje savjeta najveće Mjesne zajednice Mošćanica, koja obuhvata gotovo dvije trećine općine Stari Grad, bilo je ključno u mom društvenom angažmanu. Sa članovima tadašnjeg savjeta, uspješno smo realizovali niz projekata samostalno, ali i uz podršku drugih nivoa vlasti i nevladinog sektora. Na poticaj stanovnika same Mjesne zajednice, odlučio sam se politički angažovati unutar SDP-a Stari Grad i kandidovao sam se na lokalnim izborima, računajući na iskustvo stečeno vođenjem savjeta koji je dobio priznanja od strane Općine. Gledajući unatrag, vjerujem da je to bio dobar izbor. Kao vijećnik, imam priliku aktivno učestvovati u procesu donošenja odluka, inicirati inicijative te oblikovati javne politike i poboljšati ambijent življenja unutar naše Općine.



Šef Kluba SDP-a, Muamer Mekić i načelnik Irfan Čengić

- **Kako biste opisali vaše aktivnosti i dostignuća u Općinskom vijeću, te koje inicijative smatrate najvažnijim za Stari Grad?**

U proteklom periodu, zajedno s kolegama iz različitih stranaka unutar Općinskog vijeća Stari Grad i kluba

SDP-a, ostvarili smo mnogo toga, teško je sve nabrojati. Usredotočili smo se na probleme građana i infrastrukturu, podržavajući važne projekte kao što su izgradnja garaže i trga u ulici Avdage Šahinagića, obnova JU Doma zdravlja Stari Grad, fiskulturna sala u

## Intervju: Općinski vijećnici

OŠ "Edhem Mulabdić" te energetska učinkovitost zgrade Općine. Također smo podržali inicijative poput Start-up biznisa za mlade, Fonda za mobilnost mladih, pomoći oboljelima od celiakije te podrške sportskim klubovima i udruženjima. Nedavno sam radio na inicijativi za obnovu servisnog centra za djecu sa posebnim potrebama, a također smo kao Općina omogućili besplatne udžbenike za osnovce. Aktivno se provode inicijativa Winter Fest na području općine te podrška Odjelu Fizikalne terapije unutar JU Doma zdravlja Stari Grad.

- **Kako ste kao Vijeće reagovali na nedavna dešavanja koja su dovela do smjene načelnika, i kako ste se nosili s tim teškim vremenima?**

Nakon događaja u maju, cijela Općina je bila iznenađena, uključujući i nas kao Općinsko vijeće. Iako nismo bili dio procesa niti smo odlučivali o optužbama protiv bivšeg načelnika, odlučili smo ostati suzdržani zbog pretpostavke nevinosti. Kada je produžen pritvor optuženih, kolege iz svih stranaka složile su se da Općina mora funkcionisati te smo pokrenuli proces opoziva i prijevremenih izbora. Ova teška vremena zahtijevala su teške odluke, ali ponosni smo što smo kroz taj proces prošli dostojanstveno, bez ličnih napada. Sada, s određene distance, vidimo da je taj proces bio neizbježan i



*Istrajat ćemo na realizaciji mnogih projekata*

da je Općina Stari Grad relativno brzo dobila novog načelnika i tako obnovila povjerenje građana u instituciju lokalne samouprave.

- **Kako biste opisali novog načelnika, posebno imajući u vidu vaš odnos s njim kao članom iste stranke?**

Novoizabrani načelnik, Irfan Čengić, je osoba koju dugo poznajem, što čini moj opis subjektivnim. On je član iste stranke kao i ja, te smo bili kolege i u prethodnom sazivu Općinskog vijeća. Irfan je mlad, ali dokazan, posjeduje energiju, znanje o procesima u javnoj upravi i smatram da je odličan izbor. Okupio je ljude i stranke koje su inače na drugačijim stranama, što smatram ključnim jer smatram da su

podjele na poziciju i opoziciju na lokalnom nivou besmislene. Jasno je iznio svoje ciljeve, mjere i projekte koje želi provesti, te ima gotovo univerzalnu podršku vijećnika. Dolazak političara poput Irfana Čengića na scenu me raduje, jer ima znanje i energiju koja je potrebna, ali često ne mogu doći do izražaja zbog stare garde koja ne dopušta mlađima priliku, smatrajući da su samo oni sposobni za najodgovornije funkcije u društvu, kao što je uloga načelnika Starom Gradu.

- **Koje su vaše prioritete u kreiranju javnih politika i inicijativa za vašu Općinu, te koji su projekti i inicijative na kojima planirate raditi zajedno s novim načelnikom?**

Pri kreiranju javnih politika automatski generišemo inicijative koje planiramo realizovati i podržavati, bez obzira na njihov izvor, ako su u interesu naših građana. U saradnji s novim načelnikom, istrajat ćemo na projektima poput stadiona na lokalitetu Faletići, putne komunikacije prema Baricama, restauracije fasada u saradnji s Gradom Sarajevom, izgradnje šina i uređenja pruge unutar naše općine, vrtića Agan Bostandžić na Širokači te sportskih sadržaja unutar kasarne Mustafa Hajrulahović Talijan na Zmajevcu kao i mnogih drugih projekata. Građani će imati priliku pratiti i dinamiku realizacije ovih projekata.

## Emir Bićo, šef Kluba Naroda i Pravde u Općinskom vijeću Stari Grad

- **Koliko dugo obavljate funkciju vijećnika u Općinskom vijeću i zašto ste odlučili obavljati tu ulogu?**

Ovo je moj prvi mandat u Općinskom vijeću i trenutno završavamo treću godinu mandata. Pred ovim sazivom vijeća je još manje od godinu dana mandata. Lokalna zajednica je građivno tkivo društva, i praktično temelj države. Općina kao lokalna samouprava se za razliku od viših nivoa vlasti bavi stvarnim potrebama građana, i jedini je nivo vlasti gdje se skoro svi procesi odvijaju u neposrednoj interakciji sa građanima. Kao građanin, ali i kao osoba koja je politički aktivna, odlučio sam se na kandidaturu za vijećnika kako bih svojim idejama, ali i zahtjevima građana

kroz direktno odlučivanje pomogao u poboljšanju sveukupnog kvaliteta života u lokalnoj zajednici.

- **Čime se najviše ponosite, a učinili ste obavljajući ulogu općinskog vijećnika zajedno sa Vašim Klubom vijećnika?**

Puno toga smo kao klub, ali i kao pojedinci, pokrenuli što je rezultiralo poboljšanjem postojećeg stanja. Klub Narod i Pravda, u kojem djelujem, nije bio omiljen bivšem načelniku, ali unatoč tome, postigli smo određene stvari. Posebno sam ponosan na svoju inicijativu za proglašenje Dana maloljetnog borca Općine Stari Grad. Kao dio populacije maloljetnih branitelja, koja nažalost još uvijek nije prepoznata kao



*Šef Kluba Naroda i pravde, Emir Bićo*

zasebna kategorija branitelja, ova inicijativa barem djelomično priznaje značaj ove populacije od strane institucija.



*Postoje brojni akti koje trebamo donijeti kako bismo ponovno uspostavili stabilnost*

- *Kako ocjenjujete situaciju u kojoj se Općina Stari Grad Sarajevo našla od maja mjeseca 2023. godine i reakcije Općinskog vijeća i Vašeg Kluba na istu?*

Događaji koji su zadesili Općinu Stari Grad Sarajevo u maju 2023. godine su bili jedinstveni u svojoj prirodi. Ono što smo vidjeli u medijima su bile stvari koje niko od nas nije mogao očekivati. Međutim, ono što definitivno nismo očekivali jeste potpuna blokada institucije nakon hapšenja bivšeg načelnika i sekretarke državne službe. Lično sam i zajedno sa svojim klubom vijećnika odmah priskočio u pomoć kako bismo deblokirali procese u općini. U saradnji sa predsjedavajućim Škaljićem i Stručnom službom vijeća, radili smo na rješavanju situacije i na zadovoljstvo svih nas, kao i građana Starog Grada, uspjeli smo u tome. Smatram da smo postigli uspjeh prije svega zbog iskrenih namjera i želje da vratimo ugled našoj općini. Zahvaljujem se svim kolegama koji su nam pomogli na bilo koji način, a posebno izdvajam gospođu Mirsadu Smajić koja je hrabro stala na raspolaganje i pružila značajnu pomoć u najosjetljivijem trenutku za Općinu Stari Grad.

- *Kako ocijenjujete Vašu saradnju sa novoimenovanim načelnikom Općine Stari Grad Sarajevo i šta očekujete u narednom periodu?*

Novi načelnik, gospodin Čengiđ, je kandidat Trojke i istovremeno kandidat

### Dan maloljetnog borca Općine Stari Grad

Zahvaljujući inicijativi općinskog vijećnika Emira Biće, ove godine Općina Stari Grad se aktivno uključila u organizaciju 30. maja, Dana maloljetnog borca Općine Stari Grad. Na osnovu ove inicijative ovaj datum je trajno upisan u općinski protokol značajnih datuma i obilježavat će se svih narednih godina, kao trajna uspomena na sve maloljetnike koji su dali, i bili spremni dati svoj život za slobodu i nezavisnost Sarajeva i Bosne i Hercegovine.

Naroda i Pravde. Izuzetno me raduje što je na prijevremenim izborima dobio podršku ne samo drugih stranaka, već i samostalnih vijećnika. Naša dosadašnja saradnja s načelnikom Čengiđem je izuzetno kvalitetna, i ne vidim razloga da se to ne nastavi do kraja ovog mandata. Načelnik Čengiđ je jasno pokazao svoju predanost za saradnju s Općinskim vijećem, što me kao pojedinca, ali i kao vijećnika, izuzetno raduje. Smatram da načelnik i službe s jedne strane, te vijeće s druge strane, trebaju saradivati na osnovu međusobnog poštovanja i uvažavanja, isključivo zbog potreba i interesa građana koji su nas, na kraju krajeva, izabrali da ih predstavljamo.

- *Kakav je Vaš plan djelovanja i koje su glavne inicijative koje želite realizovati do kraja mandata i da li se planirate kandidirati na idućim Lokalnim izborima 2024. godine?*

Do kraja ovog mandata pred nama je izuzetno mnogo posla, jer se suočavamo s teškom devastacijom institucija općine zbog događaja iz maja 2023. godine. Postoje brojni akti koje trebamo donijeti kako bismo ponovno uspostavili stabilnost. Paralelno s tim, planiramo pokrenuti niz projekata, od kojih se neki već nalaze u fazi planiranja, dok se neki planiraju završiti do isteka mandata. Posebno bismo željeli završiti adaptaciju područne škole na Širokači, započeti projekt "Muzej na otvorenom" koji uključuje rekonstrukciju dijela naše, ali i agresorske prve linije u području bob staze na Trebeviću. Također, namjeravamo pokrenuti i djelomično završiti projekt Muzeja odbrane i sportsko-rekreacione zone unutar kasarne Zmajevac, izgraditi centralni spomenik za šehide i poginule branitelje, postaviti zip-line koji bi bio prvi takve vrste iznad grada, kao i provesti niz drugih manjih projekata.

Ukoliko zdravlje dozvoli, planiram se kandidovati na lokalnim izborima 2024. godine. Vjerujem da još uvijek mogu pružiti značajan doprinos razvoju Starog Grada. Nadam se da će građani prepoznati dosadašnji rad i povjerenje koje su mi već ukazali i ponovno mi dati podršku.



[\\_goropro\\_](#)

# Općina Stari Grad obnavlja vitalne puteve: 19 ulica sanirano u 2023. godini

**Investicija za bolji život: Saniranje infrastrukture za sigurniji i lakši svakodnevni život građana ●  
Uloženo više od dva miliona konvertibilnih maraka**

Općina Stari Grad Sarajevo je tokom 2023. godine uspješno nastavila s realizacijom infrastrukturnih projekata, posvećena poboljšanju kvalitete života svojih građana. Posebno se ističe rad na sanaciji brojnih ulica, čime se omogućava stanovnicima siguran i kvalitetan pristup njihovim domovima, znatno

olakšavajući njihov svakodnevni život.

Od početka ove godine, Općina je uspješno sanirala i obnovila čak 19 ulica, a u radove je uloženo više od dva miliona konvertibilnih maraka.

Obnova ulica je urađena na sljedećim lokacijama:

## **Hladivode i Baruthana (MZ Mošćanica)**

**Vrijednost projekta: 600.000 KM**

**Radovi: Asfaltiranje nakon kompletne rekonstrukcije separate kanalizacione mreže**



## **Sagrđžije (MZ Logavina)**

**Vrijednost projekta: 29.000 KM**

**Radovi: Sanacija ivičnjaka dužine 180 metara.**



## **Nafije Sarajlić (MZ Vratnik)**

**Vrijednost projekta: 41.300 KM**

**Radovi: Postavljanje asfalta umjesto kaldrme, sanacija ivičnjaka i trotoara.**



## **Obhodža (MZ Mošćanica)**

**Vrijednost projekta: 38.000 KM**

**Radovi: Sanacija i asfaltiranje dijela ulice od broja 16 do broja 24 i dijela od broja 21 do broja 27.**



## **Arapova (MZ Medrese)**

**Vrijednost projekta: 190.000 KM**

**Radovi: Zamjena stare kanalizacione mreže, asfaltiranje 120 metara ulice.**



## Projekti

### **Ablakovina (MZ Širokača)**

*Vrijednost projekta: 119.000 KM*

*Radovi: Sanacija ulice, izgradnja potpornog zida, izrada drenaže.*



### **Jekovac (MZ Kovači)**

*Vrijednost projekta: 44.000 KM*

*Radovi: Sanacija dijela ulice, uklanjanje starog asfalta i asfaltiranje.*



### **Nova Baruthana (MZ Mošćanica)**

*Vrijednost projekta: 56.000 KM*

*Radovi: Sanacija i asfaltiranje oko 200 metara ulice od broja 31 do broja 44.*



### **Prijepoljčeva (MZ Kovači)**

*Vrijednost projekta: 23.500 KM*

*Radovi: Sanacija dijela ulice dužine 50 metara.*

### **Mejlijina (MZ Medrese)**

*Vrijednost projekta: 15.000 KM*

*Radovi: Sanacija dijela ulice od broja 10 do broja 19.*



### **Budžak (MZ Bistrik)**

*Vrijednost projekta: 125.000 KM*

*Radovi: Sanacija ulice, asfaltiranje, postavljanje novih ivičnjaka i izgradnja potpornog zida.*



### **Abdesthana (MZ Kovači)**

*Vrijednost projekta: 18.100 KM*

*Radovi: Sanacija ulice dužine oko 50 metara.*





**Babića bašča  
(MZ Babića Bašča)**

*Vrijednost projekta: 20.500 KM*

*Radovi: Sanacija dijela ulice od broja 2 do dječijeg igrališta, 71 metar.*



**Žagrići  
(MZ Širokača)**

*Vrijednost projekta: 111.000 KM*

*Radovi: Sanacija ulice, postavljanje novih ivičnjaka.*



**Okrugla  
(MZ Mahmutovac)**

*Vrijednost projekta: 128.000 KM*

*Radovi: Sanacija ulice od broja 2 do broja 43, oko 320 metara.*



**Apelova cesta (MZ  
Hrid – Jarčedoli i MZ  
Širokača)**

*Vrijednost projekta: 434.000 KM*

*Radovi: Sanacija i asfaltiranje ceste dužine 900 metara.*



**Čeljigovići  
(MZ Babića Bašča)**

*Vrijednost projekta: 25.000 KM*

*Radovi: Sanacija dijela ulice od broja 55 do broja 63, 75 metara.*



**Dio ulice Bistrik  
(MZ Toka – Džeka)**

*Vrijednost projekta: 145.000 KM*

*Radovi: Sanacija dijela ulice, postavljanje novih ivičnjaka, poprečna drenaža.*



**Pogledine  
(MZ Hrid – Jarčedoli)**

*Vrijednost projekta: 23.000 KM*

*Radovi: Proširenje dijelova ulice, asfaltiranje, poboljšanje putnih prilaza.*



## Plan za početak: Rješavanje problema u ulici Bakarevića



Sa sastanka

U Općini je 18.10.2023. godine održan sastanak s ciljem provedbe Zaključka Općinskog vijeća Stari Grad, koji poziva na hitno poduzimanje aktivnosti kako bi se riješili problemi vezani za kanalizacionu mrežu u ulici Bakarevića. Sastanku su prisustvovali predstavnici Općine, uključujući tadašnju v.d. Općinskog načelnika Mirsadu Smajić, predsjedavajućeg Općinskog vijeća Stari Grad Seida Škaljića i dopredsjedavajuće Zlatana Ljuhara i Damira Saračevića, predstavnici Službe za investicije i komunalne poslove, te predstavnici KJKP 'Vodovod i kanalizacija' – izvršni direktor Nermin Kapidžija i Adnan Šerak. U ime građana iz ulice Bakarevića, sastanku su prisustvovali Ešref Salković i Širaza Brka.

### Doneseni su sljedeći koraci:

KJKP 'Vodovod i kanalizacija' će, u saradnji sa Službom za investicije i komunalne poslove Općine Stari Grad, izraditi tehničko rješenje i prijedlog finansijskih sredstava za projekat sanacije Čolinog potoka. Nakon toga, obavijestit će predstavnike Općine, koji će zatražiti da se projekat uvrsti u budžet Grada Sarajeva za 2024. godinu, jer Čolin potok spada u nadležnost Grada Sarajeva. KJKP 'Vodovod i kanalizacija' provest će provjeru stanja objekata smirivanja, čišćenja i pražnjenja, dok će Općina provjeriti legalnost svih objekata u tom pojasu. Općina će uputiti dopis JP Cestama FBiH kako bi zatražila saglasnost i tehničko rješenje za sanaciju propusta i štete, te kako bi se spriječilo daljnje urušavanje. Nakon što stignu odgovori i tehnička rješenja, Općina će uputiti dopis Vladi KS i nadležnom Ministarstvu komunalne privrede, infrastrukture, prostornog uređenja, građenja i zaštite okoliša KS kako bi se osigurala sredstva za konačno rješavanje problema.

## Projekti



# Obnova fasade na stambeno-poslovnom objektu na Baščaršiji

**Općina Stari Grad je finansirala izradu projekta sanacije i restauracije, dok je Gradska uprava Grada Sarajeva finansirala izvođenje radova**

U samom srcu Baščaršije, u ulici Safvet-bega Bašagića, u završnoj fazi je projekat sanacije i restauracije stambeno-poslovnog objekta koji nosi duh historije i kulture. Općina Stari Grad Sarajevo je finansirala izradu projekta sanacije i restauracije, dok je Gradska uprava Grada Sarajeva finansirala izvođenje radova ovog značajnog poduhvata.

Sanacija fasade ovog objekta nije bila samo obnova vanjskog izgleda, bila je to restauracija identiteta i naslijeđa. U toku projekta, otkrivena su brojna nekonstruktivna oštećenja uzrokovana prirodnim propadanjem materijala, nedostatkom redovnog održavanja i prethodnim neadekvatnim sanacionim intervencijama. Vidljiva su bila oštećenja od vlage koja su uticala na boju fasade, nedostaci na limenim opšavima i potreba za zaštitnim farbanjem, kao i eventualna zamjena stolarije.

## Obnovljena ljepota na Baščaršiji

Ovaj stambeno-poslovni objekat, smješten između ulica Safvet-bega Bašagića, Kovači i Kračule, zauzima posebno mjesto unutar Odluke o proglašenju historijskog urbanog krajolika Sarajeva nacionalnim spomenikom BiH. Svaki korak u procesu sanacije pažljivo je vođen važećom tehničkom i zakonskom regulativom Federalnog ministarstva prostornog uređenja, uz usklađenost sa uputstvima Komisije za očuvanje nacionalnih spomenika BiH, kako je definisano Odlukom o proglašenju ovog objekta nacionalnim spomenikom.

Ova restauracija nije samo obnova zidova, već i obnova duše grada, čuvanje identiteta i povratak sjaja jednom od dragulja naše baštine. Sanacija fasade je tek početak, simbol predanosti očuvanju naše historije za buduće generacije.

Zimski sjaj Starog Grada:

# Praznična čarolija pod svijetlima

**S**tari Grad zrači posebnim sjajem i toplinom tokom nadolazećih praznika, zahvaljujući projektu osmišljenom kako bi obogatio zimsku sezonu. Ovaj projekat Općine Stari Grad nije samo ostvario svoj cilj, već je preobrazio područje starogradske jezgre u ocharavajući kutak ispunjen prazničnom čarolijom. U srcu glavnog grada Bosne i Hercegovine, ova općina s najvećim turističkim potencijalom postala je epicentar izvanredne praznične atmosfere. Ključne ulice poput Štrosmajerove, Sarača, Bašçaršijskog trga, Ferhadije, Mula Mustafe Bašeskije i Zelenih Beretki zasjale su u prazničnom ruhu zahvaljujući raskošnoj dekorativnoj rasvjeti. No, to nije sve. Planira se i postavljanje tradicionalne jelke ispred Katedrale Srca Isusova, simbola praznika u ovoj predivnoj općini.

## Nadolazeći praznici donose sjaj Starom Gradu

Prošetate li ulicama Starog Grada, bit ćete okruženi svjetlošću, bojom i prazničnim duhom. Historijski šarm ovog grada dobiva novu dimenziju uz svjetlosti koje obasjavaju njegove ulice, trgove i znamenitosti. Bašçaršija, sva u svojoj drevnoj ljepoti, postaje epicentar praznične radosti. No, ova čarobna transformacija nije samo fizička. Stari Grad Sarajevo nije samo obasjao svoje ulice već i srca ljudi. Atmosfera koja spaja historiju, kulturu i duh zajedništva oživljava jezgro glavnog grada Bosne i Hercegovine. Ovdje se prošlost i sadašnjost susreću u jedinstvenom duhu praznika, podsjećajući nas na važnost dijeljenja radosti i topline među ljudima.



## Novi projekti



# Zajednički projekti Općine Stari Grad i Grada Sarajevo

**Čvrsto partnerstvo u ostvarivanju ciljeva koji će doprinijeti napretku i prosperitetu svih građana općine Stari Grad Sarajevo**

**N**akon održanog radnog sastanka, načelnika Općine Stari Grad Sarajevo, Irfana Čengića i gradonačelnice Sarajeva, Benjamine Karić, 07.12.2023. godine potpisali su osam sporazuma koji obuhvataju važne projekte i aktivnosti za razvoj Starog Grada.

Jedan od ključnih trenutaka tokom susreta bilo je uručivanje građevinske dozvole za rekonstrukciju vrtića 'Agan Bostandžić' na Širokači.

“Uručili smo građevinsku dozvolu koja je bila neophodna da bi radovi na rekonstrukciji vrtića 'Agan Bostandžić' na Širokači mogli početi. Nakon niza obećanja i višemjesečnog usporavanja ponosan sam što smo, nakon deset dana, uspjeli završiti ovu fazu. Zahvaljujem gradonačelnici Benjamine Karić i Vladi Kantona Sarajevo za njihovu ulogu u realizaciji ovog značajnog projekta, čija je vrijednost oko 2 miliona KM. Ovo je izuzetan doprinos Starom Gradu, a i Općina će učestvovati u sufinansiranju projekta”, istakao je načelnik Čengić.

Potpisivanju sporazuma prisustvovali su i predsjedavajući Općinskog vijeća Stari Grad Sarajevo Seid Škaljić, te gradski i općinski vijećnici: Vedad Deljković, Jasmin Skorupan, Muamer Mekić i Srđan Simonović.

## Načelnik Čengić i gradonačelnica Karić potpisali niz sporazuma i dokumenata:

- Sporazum o sufinansiranju i restauraciji kolorističke obnove fasada na području općine Stari Grad Sarajevo.
- Sporazum o realizaciji projekta sanacija dječijeg igrališta u sklopu Mjesne zajednice Medrese.
- Sporazum o realizaciji projekta rekonstrukcije vrtića Agan Bostandžić radi unaprjeđenja dječijih obrazovnih prostora.
- Sporazum o realizaciji projekta rekonstrukcije tvrđave Bistrik na Trebeviću, kao bitnog dijela Astronomske observatorije Trebević, što će dodatno obogatiti kulturnu i turističku ponudu.
- Sporazum o realizaciji projekta izgradnje ZIPLINE-a na području općine Stari Grad Sarajevo, što će biti dodatna atrakcija i doprinijeti razvoju turizma.
- Sporazum o realizaciji projekta sanacije Kasarne “Mustafa Hajrulahović Talijan” kako bi se uspostavio muzej Armije Bosne i Hercegovine, čime će se očuvati historijska baština i omogućiti pristup kulturnom naslijeđu.
- Sporazum o realizaciji projekta izgradnje VIEWPOINT-a na području općine Stari Grad Sarajevo
- Sporazum o realizaciji aktivnosti utvrđenih Zakonom o komunalnim taksama Kantona Sarajevo. Stari Grad Sarajevo će biti prva općina koja poštuje kantonalne zakone i uplaćuje dio prihoda Gradu Sarajevu. Ostale općine unutar Grada Sarajeva su pozvane da se pridruže potpisivanju ovog sporazuma.

# Načelnik Čengić i ministar Šteta najavili kapitalne projekte u Starom Gradu i obećali dobru saradnju

**Prvi zvanični susret od imenovanja Irfana Čengića za općinskog načelnika • Višemilionska ulaganja u Stari Grad kroz kapitalne, ali i ostale životno bitne projekte.**

U prostorijama Općine Stari Grad održan je radni sastanak između općinskog načelnika Irfana Čengića i ministra saobraćaja Kantona Sarajevo. Prvi je ovo susret od kada je Irfan Čengić preuzeo funkciju načelnika Općine Stari Grad.

Načelnik Čengić je kazao da je glavna tema susreta najava kapitalnih projekata koje će zajedno realizirati Općina i Ministarstvo. „To je prije svega projekat rekonstrukcije glavne saobraćajnice od Skenderije do Vječne vatre. Najveći dio te saobraćajnice se nalazi u Starom Gradu, vrijednost tog projekta je oko pet miliona KM, a trenutno se vrši proces odabira izvođača. Namjeravamo rekonstruisati i cestu prema izletitu Barice, za to je planirano izdvojiti 3-4 miliona KM, bez te saobraćajnice ne možemo kvalitetno razviti turizam na tom lokalitetu. U planu je i rekonstrukcija ulice Bistrik, od Trga Austrije pa sve do izlaza na tranzit, gdje će biti postavljeni i usporivači saobraćaja, što odavno traže stanovnici, a pogotovo roditelji djece koja tu u blizini idu u školu. Ovo su zasigurno najveća ulaganja u Općinu Stari Grad u posljednjih deset godina, a riječ je o iznosu od oko 6-7 miliona KM“, izjavio je načelnik Čengić, te dodao da će projekti uskoro krenuti u realizaciju, što je odmah početkom naredne godine.

Ministar saobraćaja Kantona Sarajevo Adnan Šteta je naglasio da je osim ovih kapitalnih projekata važno razgovarati i o drugim projektima i situacijama, a koje su u nadležnosti resornog ministarstva. „Specifičnost terena u Starom Gradu nalaže dobar i efikasan autobuski i minibuski gradski saobraćaj. Iako je situacija sada mnogo bolja nego prije nekoliko godina, radit ćemo da dodatno poboljšamo javni transport shodno potrebama stanovništva. Nedovoljan broj parking mjesta je također jedan od



Ministar Šteta i načelnik Čengić

## Spremni elaborati za sanaciju šest ulica u Starom Gradu

Načelnik Općine Stari Grad Irfan Čengić informisao je kantonalnog ministra saobraćaja Adnana Štetu da su stručne službe pripremile detaljne elaborate za šest ulica u Starom Gradu kojima je potrebna sanacija. Procijenjen iznos za radove u ulicama Bistrik basamaci, Pod Hridom, Paje sokak, Hadžijska ravan i Nevjestina su preko 400.000 KM. Ministar Šteta je obećao podršku resornog ministarstva u realizaciji predloženih projekata.

problema i nastojat ćemo to rješavati sa Općinom Stari Grad. Vlada Kantona Sarajevo stoji Općini i načelniku Čengiću na raspolaganju i otvoreni su za saradnju, pogotovo na konkretnim projektnim prijedlozima koji će rezultirati poboljšanjem kvaliteta života naših građana“, poručio je ministar Šteta.



Stari Grad mora imati dobar gradski prevoz



Obnova glavne saobraćajnice od Skenderije do Vječne vatre

## Protokolarne aktivnosti

# Jačanje saradnje kroz protokolarne posjete: Općina Stari Grad u akciji

**Saradnja s različitim institucijama pruža nam priliku za dijeljenje ideja, resursa i najboljih praksi**

**O**tkako je preuzeo dužnost načelnika Općine Stari Grad, Irfan Čengić aktivno se angažuje u protokolarnim posjetama raznih institucija, a sve u svrhu realizacije projekata i jačanja saradnje. Ove posjete i razmjena iskustava s drugim institucijama ključni su elementi strategije za unapređenje života u lokalnoj zajednici. Saradnja s različitim institucijama pruža nam priliku za dijeljenje ideja, resursa i najboljih praksi. Otvorenost za saradnju s drugim institucijama ne samo da omogućuje pristup dodatnim resursima, već i stvara plodno tlo za inovativna rješenja koja mogu poboljšati kvalitetu života građana.

## Prva posjeta stranih digniteta: Načelnik Čengić ugostio delegaciju iz Metropolitanskog područja Barcelone

Delegacija iz Metropolitanskog područja Barcelone, predvođena vijećnicom Elisendom Alamany, posjetila je Općinu Stari Grad i novoimenovanog načelnika Irfana Čengića. Ova posjeta označava prvi službeni dolazak stranih dužnosnika u Općinu Stari Grad od kada je funkciju općinskog načelnika preuzeo Irfan Čengić.

Vijećnica Alamany je načelnika Čengića upoznala s njihovom prisutnošću u Sarajevu zbog učestvovanja na Generalnoj skupštini i seminaru Mreže mediteranskih gradova – MedCities, gdje su članovi zajedno sa Sarajevom i još 71 lokalnom samoupravom u regiji Mediterana.

Tokom posjete, Čengić je predstavio funkcioniranje i nadležnosti lokalne samouprave u Kantonu Sarajevo, izborni proces te aktualne izazove nakon stupanja



Načelnik Čengić i vijećnica Alamany

*"Važnost ovih posjeta proizlazi iz razvoja partnerskih odnosa koji su ključni za uspješnu realizaciju projekata i programa s pozitivnim uticajem na našu zajednicu. Kroz ove susrete, gradimo mostove među institucijama i stvaramo čvrste veze koje omogućuju konstruktivnu razmjenu ideja i efikasnu realizaciju planova. Stoga, kontinuirano sam posvećen ostvarivanju ovih posjeta i održavanju otvorenih, produktivnih odnosa s različitim institucijama kako bismo osigurali da naša zajednica raste i napreduje na način koji je koristan za sve nas." - rekao je Irfan Čengić, načelnik Općine*

na dužnost općinskog načelnika. Izrazio je želju za povezivanjem s partnerima iz Zapadne Europe radi potencijalne saradnje na raznim projektima, što je naišlo na interes gostiju iz Katalonije.

Elisenda Alamany je istakla da Metropolitansko područje Barcelone obuhvata 36 općina, uz Barcelonu kao glavni grad i centralno administrativno-ekonomsko središte. Naglasila je važnost nadležnosti metropolitanske vlade u urbanoj planiranju, javnom prijevozu, vodosnabdijevanju i upravljanju otpadom. Uz Alamanyu, u posjeti su bili Marc Grau, šef kabineta, te Almir Kasumagić, predstavnik Distrikta 11 Barcelone.

Na kraju posjeta, gosti iz Katalonije su poželjeli načelniku Čengiću mnogo sreće i uspjeha u obavljanju funkcije.



Područje Barselone čini 36 općina



*Novi odnosi Općine Stari Grad i Turističke zajednice Kantona Sarajevo*

## Partnerstvo za turistički procvat: Općina Stari Grad i Turistička zajednica Kantona Sarajevo ujedinjeni u obogaćivanju ponude

Načelnik Općine Stari Grad Sarajevo Irfan Čengić, zajedno s predsjednikom Turističke zajednice Kantona Sarajevo, Harisom Fazlagićem, održao je konstruktivan sastanak s ciljem preciziranja buduće saradnje. Na tom izuzetno važnom sastanku postignut je dogovor o otvaranju turističkog informativnog centra u jednoj od najživopisnijih ulica na Baščaršiji - srcu Sarajeva koje je prepoznato u turističkom svijetu.

Ovo partnerstvo ima za cilj jačanje saradnje kroz zajedničke projekte koji će obogatiti turističku ponudu na području općine Stari Grad. Statistički gledano, ovo područje je najposjećeniji turistički dio u Kantonu Sarajevo. Ono predstavlja riznicu kulturnog i historijskog naslijeđa te obiluje bogatom gastronomskom po-



*Načelnik Čengić i predsjednik Fazlagić dogovorili saradnju*

nudom, istovremeno predstavljajući dio grada s izuzetnim turističkim potencijalom.

Turistička zajednica Kantona Sarajevo je angažovala sve svoje raspoložive resurse kako bi osigurala da turistička ponuda u ovom dijelu Sarajeva bude što kvalitetnija. Njihov cilj je osigurati da posjetitelji Sarajeva odlaze zadovoljni, s željom da se ponovno vrate i istraže sve bogatstvo koje ovo područje nudi. Ova saradnja otvara vrata za unapređenje turističkog iskustva posjetitelja te naglašava predanost u očuvanju i promociji kulturne baštine ovog jedinstvenog dijela grada.



*Nezaobilazna destinacija svih turista je Stari Grad*

## Protokolarne aktivnosti

# Otvoren dijalog i saradnja: Posjeta zamjenice premijera Republike Kosovo Općini Stari Grad

Općinski načelnik Irfan Čengić ugostio je Emiliju Redžepi, zamjenicu premijera Republike Kosovo Albina Kurtija, pružajući joj dobrodošlicu u Općinu Stari Grad Sarajevo. Ovaj susret označio je čestitanje dopremijerke Redžepi na izbornoj pobjedi i imenovanju na funkciju načelnika Općine Stari Grad.

Dopremijerka kosovske vlade istaknula je zadovoljstvo zbog sve većeg broja mladih, progresivnih političara na političkoj sceni Bosne i Hercegovine. Razgovor se usredotočio na odnose između Bosne i Hercegovine i Kosova, posebno naglašavajući poteškoće koje svakodnevni život donosi građanima, posebno Bošnjacima Kosova.

Načelnik Čengić istakao je važnost ratifikacije Sporazuma o slobodnom kretanju potpisanog u ime Bosne i Hercegovine od strane Zorana Tegeltije. Ovaj

korak bi ukinuo vizni režim sa Kosovom, otvarajući put slobodnom putovanju građana između dvije zemlje.

Osim dopremijerke Redžepi, u posjeti Općini Stari Grad bili su Avdo Đešević, zamjenik kosovskog ministra za lokalnu

samoupravu, te Daut Ese, savjetnik dopremijerke za ekonomska pitanja. Posjeta je naglasila važnost otvorenog dijaloga i saradnje između dvije zemlje te potrebu za rješavanjem ključnih pitanja koja utiču na život građana i bilateralne odnose.



*Čengić i Redžepi: Što prije ukinuti vizni režim*

## Aktivno učestvovanje u Skoplju za bolju budućnost BiH i regije

Načelnik Općine Stari Grad Sarajevo, Irfan Čengić boravio je u Skoplju, gdje je aktivno učestvovao u nizu važnih događaja i sastanaka s istaknutim zvaničnicima EU i regije.

Jedno od njegovih zapaženih učestvovanja bilo je kao uvodničar na panelu posvećenom budućnosti Zapadnog Balkana i odnosu s EU, zajedno s potpredsjednikom Vlade Sjeverne Makedonije, Bojanom Maričićem, te zastupnicom u Parlamentu Švedske, Azrom Muranović. Ističući nužnost nastavka naporog rada na ispunjavanju obveza prema EU, načelnik Čengić je naglasio kako je ta putanja jedina opcija koja može donijeti poboljšanja u Bosni i Hercegovini, unatoč trenutnoj situaciji koja nije zadovoljavajuća.

Tokom posjeta, načelnik Čengić je također održao sastanak s ministrom unutrašnjih poslova Sjeverne Makedonije, Oliverom Spasovskim, te sa načelnikom pobratimske općine Karpoš u Skoplju, Stevčetom Jakimovskim, kako bi razgovarali o budućim odnosima između ove dvije pobratimske lokalne zajednice.



*Načelnik Čengić na panel diskusiji u S.Makedoniji*





*Očuvanje kulture sjećanja obaveza je svih nas*

## Jačanje kulture sjećanja: Načelnik Starog Grada u saradnji s Ministrom za boračka pitanja i direktorom Memorijalnog centra

Načelnik Općine Stari Grad Sarajevo, Irfan Čengić, održao je sastanak sa ministrom za boračka pitanja Kantona Sarajevo, Omerom Osmanovićem, te Ahmedom Kulanićem, direktorom Memorijalnog centra Sarajevo.

Fokus razgovora bio je na projektima razvijanja kulture sjećanja, gdje je načelnik predstavio Vladi Kantona Sarajevo planove kao što su obnova kasarne "Mustafa Hajrulahović Talijan" te izgradnja Muzeja opsade u objektima u centralnom dijelu općine.

Ministarstvo za boračka pitanja KS i Općina Stari Grad Sarajevo udružiti će snage u narednom periodu kako bi zajednički sanirali nekoliko stambenih jedinica, namijenjenih boračkoj populaciji. Načelnik Čengić istakao je predanost



*Načelnik Čengić, ministar Osmanović i direktor Kulanić*

realizaciji zaostalih obveza, uključujući i podršku radu Memorijalnog centra Sarajevo. Očekuje se da će ova podrška biti realizovana nakon usvajanja rebalansa budžeta, koji je na dnevnom redu sjednice Općinskog vijeća zakazane za 30.11. Ova saradnja označava važan korak u očuvanju historijske baštine te jačanju kulture sjećanja u zajednici.



*Podrška i za JU Fond memorijala KS*

## Obezbjedenje ogrjeva za socijalno ugrožene



*Podrška najugroženijim članovima našeg društva*

Općinski načelnik Općine Stari Grad Sarajevo objavio je Javni poziv za obezbjeđenje ogrjeva licima u stanju socijalne potrebe za 2023. godinu putem Službe za boračko-invalidsku i socijalnu zaštitu. Cilj ovog poziva je pružanje podrške pojedincima koji se suočavaju s teškom ekonomsko-socijalnom situacijom, posebno u smislu osiguravanja ogrjeva za zagrijavanje svojih domova.

### Ova inicijativa ima za cilj pružiti podršku najugroženijim članovima našeg društva

Pravo na učešće imaju svi građani koji zadovoljavaju uslove propisane Pravilnikom o ostvarivanju prava na jednokratnu novčanu pomoć licima u stanju socijalne potrebe. To uključuje osobe s prebivalištem ili boravištem na području općine Stari Grad Sarajevo najmanje godinu dana prije podnošenja prijave. Također, mogu se prijaviti i lica s boravištem kraćim od godinu dana, ali koja su stupila u bračnu zajednicu sa stanovnikom koji zadovoljava uvjete prebivališta ili boravišta dužeg od godinu dana. Rok za podnošenje prijava na Javni poziv je 15 dana od dana objavljivanja - 28.11.2023. godine.

Ova inicijativa ima za cilj pružiti podršku najugroženijim članovima našeg društva. Ovaj Javni poziv predstavlja važan korak u podršci socijalno ugroženim građanima općine Stari Grad Sarajevo, pružajući im šansu da se lakše nose s izazovima hladnih zimskih mjeseci.

## Podrška

# Volonteri Općine Stari Grad: Snaga za bolju lokalnu zajednicu



*Podrška načelnika Čengića mladim ljudima*

**N**ačelnik Općine Stari Grad Sarajevo, Irfan Čengić, povodom Međunarodnog dana volontera 5. decembra, organizovao je svečani prijem kako bi istakao važnost i angažman trenutnih volontera, te pružio podršku budućim volonterima koji će se pridružiti volonterskim aktivnostima u Općini. Ovaj događaj predstavljao je priliku da se izrazi zahvalnost volonterima na njihovom nesebičnom radu, ali i da se istakne važnost volonterskog angažmana za budućnost općine. Tokom prijema, volonteri su imali priliku podijeliti svoja iskustva, razgovarati o izazovima s kojima se susreću te istaknuti svoje ideje za unapređenje budućih volonterskih aktivnosti. Ova interakcija između volontera i općinskih zvaničnika stvorila je poticajnu atmosferu za daljnju saradnju i razvoj volonterskih programa. Važno je istaknuti da je ovo njihovo prvo radno iskustvo u organu uprave, što čini ovaj

događaj još značajnijim za njihov daljnji angažman.

Poseban naglasak bio je stavljen na volontere koji će se pridružiti volonterskim programima u narednoj godini. Načelnik Čengić je izrazio nadu da će njihov entuzijazam i posvećenost biti ključni faktori u ostvarivanju novih ciljeva općine te je istakao spremnost općine da podrži njihove inicijative, te je naglasio da će tražiti podršku od Općinskog vijeća da broj volontera bude veći nego prethodnih godina.



*Podrška budućim volonterima*

## Uskoro novi pravilnik o volontiranju

Načelnik Čengić istakao je ključnu ulogu volontera u unapređenju zajednice te naglasio da njihov predan rad čini značajnu razliku u životima građana Starog Grada.

“Sve osobe koje su aplicirale za stručno osposobljavanje u Općini zaključno sa današnjim danom će dobiti priliku za sticanje radnog iskustva u narednih godinu dana. Primjetio sam da je ova oblast neuređena i dato preveliko diskreciono pravo načelniku Općine zbog čega ću predložiti da Općinsko vijeće donese pravilnik kako bi uredili ovu oblast i dale jednake šanse svima. Usljed velikog broja odlaska službenika iz Općine u proteklim godinama i nedostatka službenika, pomoć volontera će biti još značajnija u radu našeg organa uprave jer procesi prijema državnih službenika će trajati mjesecima, a građani već dugo nisu imali potpuno funkcionalnu Općinu”, istakao je načelnik Čengić.

## Podrška

# Objavljene preliminarnе liste stipendija Općine Stari Grad

**Podrška nastavku školovanja i raznolikosti učenika u Starom Gradu; Transparentan proces osigurava jednakost i pravednost u dodjeli stipendija, podržavajući raznolikost i potencijal unutar lokalne zajednice**

**S**tipendije koje Općina Stari Grad Sarajevo dodjeljuje predstavljaju značajan korak u podršci različitim skupinama unutar lokalne zajednice. Kroz javne konkurse, Općina prepoznaje važnost obrazovanja i talenta te pruža podršku onima čija se situacija može poboljšati ovim oblikom podrške. Tri preliminarnе liste koje je Općina Stari Grad Sarajevo objavila imaju ključnu ulogu u transparentnom procesu dodjele stipendija.



*Podrška za djecu boračke populacije*

## Stipendije za djecu boračke populacije

Preliminarna lista za stipendije djece boračke populacije sadrži 196 dobitnika, od kojih su 112 učenika i 84 studenata. Ova lista obuhvata one čije su prijave zadovoljile propisane uslove, a postat će konačna nakon isteka žalbenog roka. Uključivanje djece boračke populacije s prebivalištem na području općine Stari Grad Sarajevo pokazuje angažman Općine prema podršci ovim porodicama.



*Preliminarna lista za nadarene učenike i studente broji 214 stipendista*

## Stipendije za nadarene učenike i studente

Preliminarna lista za nadarene učenike i studente broji 214 stipendista, među kojima su 143 učenika i 71 student. Ova lista reflektira odabrane pojedince temeljem njihovih izvanrednih talenata i dostignuća u obrazovanju. Provedena detaljna konkursna procedura omogućila je transparentan proces odabira.



*Snažna podrška Općine u očuvanju tradicionalnih zanata*

## Stipendije za učenike deficitarnih zanimanja

Treća preliminarna lista obuhvata tri učenika koji ispunjavaju kriterije stipendiranja učenika/šegрта iz oblasti deficitarnih i starih tradicionalnih zanata-obrta/zanimanja.

Ova vrsta stipendija ističe snažnu podršku Općine u očuvanju tradicionalnih zanata, istovremeno potičući obrazovanje u područjima od presudnog značaja za lokalnu zajednicu. Nažalost, primjećuje se nedovoljna zainteresiranost mladih za ove vrijedne zanate.

Svaka od ovih preliminarnih lista predstavlja korak prema konačnom odab-

iru korisnika stipendija. Nakon isteka rokova za žalbe ili dodatnih procedura, ove liste postat će konačne, čime će biti definisani krajnji korisnici podrške općine u području stipendiranja obrazovanja. Ovaj transparentan proces osigurava jednakost i pravednost u dodjeli stipendija, podržavajući raznolikost i potencijal unutar lokalne zajednice.

## Predstavljamo pobratime



# Grad Makarska – Dalmatinski biser i omiljena destinacija BiH građana



**Prijateljstvo Starog Grada i Makarske od 2015. godine • Bogata i burna historija • Turisti ostvarili više od 480.000 noćenja u Makarskoj**

**P**osebna spona Sarajlija i Makarana proteže se kroz mnoga desetljeća, mnoge živote, porodice, čak i pjesme. Ova veza je postala još dublja i snažnija u vrijeme agresije kada je Makarska postala drugi dom za brojne izbjeglice iz Sarajeva. Rijetki su građani Starog Grada i Sarajeva, a da nisu barem jednom u životu posjetili Makarsku i uživali u ljepotama ovog dalmatinskog i mediteranskog bisera. Sve ovo je bio temelj za potpisivanje Sporazuma o bratimljenju i saradnji u maju 2015. godine između Općine Stari Grad i Grada Makarske.

„Ja bih kazao da je ovo formalizacija jedne višedesetlječne saradnje, a kada to kažem smatram da je saradnja između naših građana postojala i prije agresije, te se ta saradnja nastavila i tokom 90-ih go-

## Rekordna posjeta 2023. godine

Prema zvaničnim brojkama Turističke zajednice Grada Makarske u ovom dalmatinskom gradu u 2023. godini boravilo je blizu 90.000 turista, a koji su ostvarili oko 480.000 noćenja. Brojke su to koje se u potpunosti ravnaju sa već čuvenom predpandemijskom 2019. godinom. Pod Biokovom su najviše i najduže boravili gosti iz Poljske, Bosne i Hercegovine, Njemačke, Švedske, Ukrajine, Mađarske, Češke, Slovačke, Hrvatske i Norveške.



*U 2023. više od 90.000 turista boravilo u Makarskoj*

dina, kada Makarska nije bila razrušena kao nepokoreno Sarajevo, ali je primila dosta izbjeglica u svoje domove,“ ka-

zao je prilikom potpisivanja tadašnji gradonačelnik Makarske Tonči Bilić.

Makarska administrativno pripada



*Omiljena destinacija za BiH turiste*

Splitsko-dalmatinskoj županiji i sa preko 13.000 stanovnika jedna je od većih lokalnih samouprava. Nalazi se oko 60 kilometara jugoistočno od drugog po veličini hrvatskog grada Splita i oko 140 kilometara sjeverozapadno od Dubrovnika, jedne od najuglednijih turističkih destinacija u svijetu.

## Iliri, Rimljani, srednjovjekovna Bosna, Osmanlije, Mlećani, Austrougari....

Kao što je Stari Grad Sarajevo, i Makarska se može pohvaliti prebogatom, ali i vrlo burnom, nerijetko i krvavom historijom. Makarska je među najstarijim gradovima na hrvatskom dijelu Jadrana. Uz rubove grada, na podnožju masiva planine Biokovo (1762 metara nadvisine) život se organizirao još u prahistoriji. Smatra se da je Makarska dobila ime po obližnjem selu Makru u biokovskom podnožju. Prvi stanovnici područja današnje Makarske su bili Iliri, koji su još u 4. stoljeću osnovali naselje po imenu Muccurum.

Utvrđeno ilirsko naselje na Sv. Petru u prvim stoljećima stabilne rimske vladavine gubi na važnosti. Grad se od 1. st. razvija u podnožju, na mjestu današnje Makarske. Ispočetka je imao status municipija, naselja s lokalnom samoupravom romaniziranog ilirskog stanovništva. Makarska se češće spominje u 14. i 15. st. u vrijeme plemstva Kačića. Pod vrhovnom je vlašću bosanskih banova i hrvatskih regionalnih gospodara, a potom moćnih hercegovačkih vladara iz porodice Kosača. Važnost Makarske ogleda se u nastojanjima Venecije da je pridobije pod svoju upravu, što joj uspeva tek krajem 17. stoljeća, do kada su Makarskom vladale Osmanlije.

Do ulaska Makarske u jugoslovensku, a nakon toga i nezavisnu hrvatsku državu, njom su vladali Austrougari. Kao i u cijeloj Dalmaciji, austrougarske su vlasti nametnule politiku italijanizacije, a službeni jezik bio je italijanski. Makarski zastupnici u Dalmatinskom saboru u Zadru i Carevinskom vijeću u Beču tražili su uvođenje hrvatskog jezika u javni život, ali su se vlasti tome uporno protivile. Makarska je jedna od prvih sredina koja je uvela hrvatski i to 24. oktobra 1865. godine. Te godine je u Makarskoj po prvi put umjesto italijanskog uveden hrvatski jezik, pa je

tadašnje Općinsko vijeće donijelo odluku kojom hrvatski jezik postaje službeni jezik. Danas se 24. oktobar slavi kao Dan Grada Makarske.

## Makarska, jedna od najpoznatijih turističkih destinacija u Hrvatskoj

Nakon izrazito burne i turbulentne historije, Makarska je danas istaknuto regionalno, ali i evropsko turističko središte, smješteno u potkovastom zaljevu između planine Biokovo i Jadranskog mora. Grad je poznat po šetalištu okruženom palmama, gdje kafići, barovi, restorani i butici gledaju na luku. Uz plažu se nalazi nekoliko hotela velikog kapaciteta, kamp, te hiljade apartmanskih jedinica. Makarska je i središte Makarske rivijere, popularno turističko odredište podno planine Biokovo, koje se proteže 60 km između općina Brela i Gradac. Makarska je dobitnik mnogobrojnih nagrada u turizmu za uređenje grada i okoliša, za kvalitetu i raznolikost ugostiteljskih i turističkih usluga. Makarska je grad koji živi od turizma i za turizam, to je grad mladosti, sporta i zabave.

## Protokolarne posjete



# Povezivanje gradova i općina: Općina Stari Grad u prijateljskim posjetama

**Razmjena ideja i partnerstvo u cilju jačanja lokalnih zajednica: Delegacije Općine Stari Grad aktivno učestvuju u interakciji s pobratimskim gradovima kako bi unaprijedili saradnju, podijelili ideje te izgradili održiva partnerstva, jačajući tako svoju lokalnu zajednicu**

Općina Stari Grad Sarajevo aktivno njeguje međunarodne veze s pobratimskim gradovima kako bi ojačala saradnju i razmjenu ideja. U proteklom periodu, delegacije Općine Stari Grada Sarajevo posjetile su nekoliko ključnih općina, ističući važnost povezivanja lokalnih zajednica radi unapređenja saradnje i razvoja.

## Opština Karpoš (Skoplje)

Delegacija Općine Stari Grad Sarajevo, predvođena sekretarom organa državne službe Mirsadom Smajić, Seidom Škaljićem, predsjedavajućim Općinskog vijeća, te pomoćnikom načelnika Sadžidom Brkanić, posjetila je Opštinu Karpoš u Skoplju, s kojom Stari Grad dijeli pobratimске veze od 2011. godine. U sklopu obilježavanja 47. godišnjice osnivanja Karpoša, delegacija

je bila počasni gost na svečanoj akademiji u Dramskom pozorištu Skoplje. Okupili su se gradonačelnik Stevčo Jakimovski, članovi vijeća Opštine Karpoš, predstavnici lokalne uprave te delegacije iz drugih pobratimskih opština. Uz svečani prijem, delegacije su razgovarale o trenutnim aktivnostima u svojim opštinama, ekonomskim tokovima te izazovima s kojima se lokalne samouprave suočavaju. Kao gest prijateljstva, razmijenili su simbolične poklone kako bi dodatno ojačali veze između opština.

## Opština Čair (Skoplje)

Delegacija je također imala priliku susresti se s načelnikom pobratimске Opštine Čair u Skoplju. Općina Stari Grad Sarajevo je uspostavila pobratimске odnose s ovom općinom 2021. godine potpisom sporazuma o suradnji i bratimljenju. Tokom posjete Skoplju, delegacija Općine Stari Grad imala je susret s načelnikom Visarom Ganiuom kako

bi ga upoznali s trenutnom situacijom u našoj lokalnoj zajednici i planovima za budućnost. Sastanak pobratimskih općina rezultirao je općim zaključkom o potrebi intenziviranja suradnje, posebno kroz zajedničko sudjelovanje u međunarodnim projektima.



Sa načelnikom Opštine Čair

## Općina Makarska (Republika Hrvatska)

Delegacija Općine Stari Grad Sarajevo učestvovala je u obilježavanju Dana Grada Makarske, s kojim je povezana pobratimskim odnosima od 2015. godine. Delegaciju, uključujući sekretara organa državne službe Mirsadu Smajić, predsjedavajućeg Općinskog vijeća Seida Škaljića i vijećnika Emira Biću, dočekali su gradonačelnik Zoran Paunović i predsjedavajuća Gradskog vijeća Gordana Muhtić.

Gradonačelnik Paunović i predsjedavajuća Muhtić organizovali su prijem za sve delegacije pobratimskih gradova i općina, gdje je Seid Škaljić, predsjedavajući Općinskog vijeća Stari Grad, istakao: “Općina Stari Grad Sarajevo i Grad Makarska dijele mnogo toga. Obje zajednice imaju važnu ulogu turizma. Stanovnici Sarajeva rado posjećuju Makarsku, kao i stanovnici Makarske Sarajevo. Drago mi je što imamo izvrsnu saradnju i na institucionalnom nivou te se nadamo podizanju te saradnje na veći nivo u budućnosti.”

## Opština Bar (Republika Crna Gora)

Delegacija Općine Stari Grad, predvođena predsjedavajućim Općinskog vijeća Seidom Škaljićem, posjetila je Opštinu Bar na poziv predsjednika Dušana Raičevića radi učestvovanja u svečanostima povodom Dana oslobođenja ove crnogorske lokalne samouprave.

Uz Škaljića, Mirsada Smajić, sekretar organa državne službe, i Muamer Mekić, općinski vijećnik, bili su prisutni u Baru. Svečana sjednica Općinskog vijeća Bar, obilježena 24. novembra kao Dan oslobođenja od fašističke okupacije, bila je prilika za predstavljanje dešavanja u Općini Stari Grad te nedavnog imenovanja novog općinskog načelnika, Irfana Čengića. Predsjedavajući Škaljić istakao je da je Općinsko vijeće Stari Grad prošle godine usvojilo zaključak o potpisivanju Sporazuma o saradnji s Općinom Bar te da će uskoro odrediti datum za potpisivanje sporazuma.



*Delegacija Općine učestvovala u obilježavanju Dana Grada Makarske*



*Delegacija na obilježavanju povodom Dana oslobođenja Opštine Bar*



*Delegacija na obilježavanju povodom Dana Opštine Budva*

## Opština Budva (Republika Crna Gora)

Delegacija Općine Stari Grad Sarajevo prisustvovala je svečanoj sjednici Skupštine opštine Budve, održanoj u povodu Dana Opštine

Budva, obilježenog 22. novembra. Istog dana prije osam godina, u Budvi je potpisan Sporazum o bratimljenju i saradnji između Općine Stari Grad Sarajevo i Opštine Budva. Od tada su ove dvije lokalne zajednice usko povezane prijateljskim odnosima i zajedničkom suradnjom.

Dan državnosti Bosne i Hercegovine

# Delegacija Općine posjetila značajne lokacije i odala počast

Prije 80 godina predstavnici svih naroda su odlučili da žive u zajedničkoj državi u granicama



**D**elegacija Općine Stari Grad Sarajevo, predvođena općinskim načelnikom Irfanom Čengićem, obilježila je 25. novembar, Dan državnosti Bosne i Hercegovine.

Delegaciju su činili i dopredsjedavajući Općinskog vijeća Stari Grad Zlatan Ljuhar, te općinski vijećnici Šejla Uzunović, Željko Ler, Salih Išerić, Emir Bićo i Alija Begić. Predstavnici Općine su položili cvijeće i proučili Fatihu na značajnim spomenicima za Sarajevo i cijelu Bosnu i Hercegovinu i to: Vječna

vatra, Šehidsko mezarje Kovači i mezar prvog predsjednika Alije Izetbegovića, Spomenik ubijenoj djeci opkoljenog Sarajeva 1992-1995 i Spomen park „Vraca“.

Uz delegaciju iz Općine Stari Grad, obilježavanju ovog značajnog datuma za našu zemlju su prisustvovali predstavnici svih nivoa vlasti od državnih, federalnih, pa do kantonalnih, gradskih i općinskih, ali i brojna građanska udruženja.

„Ovo je jedan veoma važan datum u našoj historiji. Prije 80 godina predstavnici svih naroda su odlučili da žive u zajedničkoj državi u granicama, koje smo još tad utvrdili, a ostale su i do danas. Obaveza za nove generacije je da 80 godina poslije štite suverenitet i granice Bosne i Hercegovine, jer smo imali izazove koje druge republike bivše Jugoslavije nisu. To je suočenje sa agresijom, genocidom i brojnim ratnim zločinima. Građani danas trebaju biti ponosni na svoju domovinu Bosnu i Hercegovinu, ne trebaju mnogo razmišljati o politici i političarima, ne smiju poistovjećivati vladu i domovinu“

Irfan Čengić, načelnik Općine



Na današnji dan prije 80 godina u Mrkonjić Gradu održano je zasjedanje Zemaljskog antifašističkog vijeća narodnog oslobođenja Bosne i Hercegovine – ZAVNOBIH-a. Na tom zasjedanju je donesena odluka o obnovi državnosti BiH, potvrđene su njene historijske granice, a Bosna i Hercegovina je definisana kao jedna od šest ravnopravnih republika u tadašnjoj Jugoslaviji. Ono što je najbitnije da je tada odlučeno da BiH bude zbratimljena zajednica u kojoj će biti osigurana puna ravnopravnost svih njenih naroda i narodnosti.



*Odata počast i na Šehidskom mezarju Kovači i mezaru prvog predsjednika Alije Izetbegovića*

## Međunarodna saradnja za bolju budućnost: Susret načelnika Općine i predstavnice Tirane

Načelnik Općine Stari Grad, Irfan Čengić, ugostio je 25.11.2023. godine Rominu Kuko, predsjednicu Gradskog vijeća Tirane i istaknutu zamjenicu ministra unutarnjih poslova Albanije. Njihov sastanak označio je važan korak prema uspostavljanju saradnje između ovih gradova, otvarajući vrata razmjeni iskustava i ideja između njihovih lokalnih zajednica.

Romina Kuko je zahvalila na srdačnom gostoprimstvu te je čestitala 25. novembar, Dan državnosti Bosne i Hercegovine, istaknuvši svoje duboko poštovanje i podršku za daljnji razvoj lokalnih zajednica. Tokom njihovog susreta, fokus je bio na iskustvima povezanim s organizacijom Tirana European Youth Capital 2022, događaja koji je značajno obilježio tiranski angažman u promicanju mladih i njihovih ideja. Tirana je s ponosom ocijenjena kao izvrstan domaćin ovog značajnog događaja u 2022. godini. Iskustva koja je Romina Kuko podijelila imaju veliku važnost za Općinu Stari Grad, posebno u kontekstu kandidature Grada Sarajeva za Evropsku prijestolnicu mladih 2026. godine, predstavljenu od strane gradonačelnice Karić.



*Odata počast i na Spomeniku ubijenoj djeci opkoljenog Sarajeva 1992-1995*

"Uvjereni smo da je razmjena iskustava i najboljih praksi ključna za uspostavljanje bolje saradnje među lokalnim zajednicama. Naši izvrsni razgovori o brendiranju općine/grada, upravljanju projektima te saradnji s međunarodnim partnerima bili su inspirativni, pružajući nam smjernice za akciju u našim zajednicama", izjavio je načelnik Čengić nakon sastanka.

Ovaj susret nije samo označio važnost međunarodne saradnje već i potvrdio odlučnost lokalnih vlasti da preuzmu inicijativu u stvaranju boljeg okruženja za mlade te unaprijede kvalitetu života u svojim zajednicama.



*Uspostavljanje bolje saradnje među lokalnim zajednicama*

## Kolumna

# Usvojen Nacrt Strategije razvoja Općine Stari Grad Sarajevo za period 2024-2027

**Dokument za ugodno življenje svih građana Starog Grada – Poboljšanje svih usluga i općeg ambijenta – Javna rasprava do 30.12.2023.**

Općinsko vijeće Stari Grad Sarajevo je 30. novembra 2023. godine utvrdilo Nacrt Strategije razvoja Općine Stari Grad Sarajevo za period 2024 – 2027. godine. Ova ambiciozna strategija postavlja smjernice za održiv razvoj i unapređenje života građana na području općine.

Strategija razvoja Općine Stari Grad Sarajevo je integrirani, multisektorski strateški dokument kojim su definisane javne politike s ciljem razvoja ove jedinice lokalne samouprave i kreiranja ambijenta za ugodno življenje svih stanovnika Općine Stari Grad Sarajevo. Strategijom razvoja utvrđuju se ciljevi razvoja Općine Stari Grad Sarajevo, način njihovog ostvarivanja, finansijska konstrukcija, kao i sam način praćenja ostvarivanja postavljenih ciljeva i izvještavanja. Strategija razvoja uvažava prioritete prostornog razvoja i razvojne pravce definisane u strateškim dokumentima Kantona Sarajevo i Federacije BiH, Bosne i Hercegovine, kao i u dokumentima relevantnim za proces evropskih integracija i drugim relevantnim dokumentima.

Također, poseban naglasak stavljen je na poboljšanje infrastrukture i javnih usluga. Planira se ulaganje u modernizaciju saobraćajne mreže, obnovu javnih prostora, sanaciju klizišta te unaprjeđenje sistema vodosnabdijevanja i odvodnje. U segmentu socijalne politike, strategija se fokusira na poboljšanje uvjeta života građana. Planiraju se i projekti koji će poticati obrazovanje, kulturu i sport, s ciljem stvaranja dinamičnog i inkluzivnog društva i unapređenja rekreativnih sadržaja za građane svih generacija.

Jedan od ključnih ciljeva strategije je unapređenje turističke ponude kako bi se privukli turisti iz različitih dijelova svijeta. Planiraju se ulaganja u obnovu kulturne baštine, stvaranje atraktivnih turističkih ruta te promicanje lokalnih tradicija i manifestacija.



*Strategija namjerava poboljšati život u Starom Gradu do 2027. godine*

Očekuje se da će implementacija strategije imati pozitivan utjecaj na zapošljavanje a posebno u turističkom sektoru, potičući rast malih i srednjih poduzetnika koji se bave turizmom. Također, planiraju se programi edukacije samozapošljavanja za nezaposlene te edukacije i podrška za obrtnike i lokalne aktere u turističkoj industriji.


Na izradi Nacrta Strategije razvoja Općine za period 2024-2027 radio je prof.dr. Đevad Šašić, konsultant Saveza općina i gradova FBiH i Agencije za državnu službu FBiH na izradi razvojnih strategija




*Strategiju radio prof.dr. Đevad Šašić*

## Vrijednost strateških projekata blizu 52 miliona KM

Ukupna procijenjena vrijednost predloženih projekata unutar Nacrta Strategije iznosi 51.865.000,00 KM, od čega Općina Stari Grad Sarajevo planira osigurati 21.995.000,00 KM (42%). Nacrtom Strategije su utvrđeni indikatori putem kojih će se pratiti implementacija Strategije, a samim tim i razvoj općine u periodu 2024-2027. Kako bi strategija bila potpuno operacionalizirana predviđena je izrada godišnjeg i trogodišnjeg plana rada.



*Strategija razvoja Općine Stari Grad Sarajevo 2023-2027.  
(nacrt) - javna rasprava*



Naziv institucije	Telefon
Policija	122
MUP Stari Grad	033/ 532-000
Hitna pomoć	124
Vatrogasci	123
Taxi Sarajevo	1515
Turistički informativni centar	033/ 532-606 i 580-999
Info centar Općine	033/ 233-184
Mjesne zajednice	033/ 265-526
Porezna uprava	033/ 555-481
Apoteka „Baščaršija“	033/ 272-300
Biro Stari Grad	033/ 557-247
Općina Stari Grad Sarajevo	033/ 282-300

Općinska služba	Telefon
Služba kabineta općinskog načelnika	033/282-400
Općinsko vijeće	033/282-313
Služba za odnose s javnošću i informacione sisteme	033/282-491
Služba civilne zaštite	033/282-395
Služba za investicije i komunalne poslove	033/282-417
Služba za urbanizam	033/282-316
Služba za imovinsko-pravne, geodetske poslove i katastar i stambene poslove	033/282-335
Služba za boračko-invalidsku i socijalnu zaštitu	033/282-397
Sektor za tehničke poslove i obezbjeđenje	033/282-452
Služba za opću upravu i inspeksijske poslove	033/282-357
Služba za finansije	033/282-427
Služba za privredu	033/282-359
Općinsko pravobranilaštvo	033/282-371
Služba za obrazovanje, kulturu i sport	033/282-365
Služba za lokalni razvoj i poslove mjesnih zajednica	033/265-525

-  Informacije
-  Policija
-  Parking
-  Prva pomoć
-  Toalet
-  Pošta
-  Banka



*Sretni božični  
i novogodišnji  
praznici!*